

摘藻堂四庫全書薈要

集部

欽定四庫全書薈要

集部

范文正集卷三

四

詳校官助教臣常循



欽定四庫全書薈要卷一萬四千二百二十八

集部

范文正集卷三

宋 范仲淹 撰

律詩

睢陽學舍書懷

白雲無賴帝鄉遙  
漢苑誰人奏洞簫  
多難未應歌鳳鳥  
薄才猶可賦鷓鴣  
瓢思顏子心還樂  
琴遇鍾君恨即銷  
但使斯文天未喪  
澗松何必怨山苗



詠史五首

陶唐氏

純衣黃冕歷星辰  
白馬彤車一百春  
莫道茅茨無復見  
古今時有致堯人

有虞氏

成都成邑即天開  
終踐堯基詠起哉  
但得四門元凱至  
九韶何必鳳皇來

夏后氏

景命還將伯益傳九川功大若為遷謳歌終在吾君子  
豈是當時不讓賢

商人

履癸昆吾禍莫移應天重造帝王基子孫何事為炮烙  
不念嘻吁祝網時

周人

斧鉞為藩忍內侵商人塗炭奈何深不煩魚火明天意  
自有諸侯八百心

次韻和劉夔判官對雪

菽菽樓臺外新輝溢四遐雲中凋玉葉星際落榆花獄  
色參差露松聲髣髴加風流裁賦苑清苦讀書家霜女  
慙輕格蟾娥讓素華孤鴻迷鳥道萬馬憶龍沙淨拂王  
恭瑩香滋陸羽茶載歌勞郢謝一奏待鍾牙幾處和梅  
賞何人為鬢嗟含毫看不足詩社好生涯

河朔吟

太平燕趙許閒遊三十從知壯士羞敢話詩書為上將

猶憐仁義對諸侯子房帷幄方無事李牧耕桑合有秋  
民得袴襦兵得帥禦戎何必問嚴尤

和黃總太博上知郡杜少卿

萬石君賢再出麾猶龍川上五歌時九重執憲清規在  
十鎮分憂白髮知環禁申威星拱極鈴齋舒嘯月侵帷  
金臺下客思何報願上中和樂職詩

過太清宮

醜石危松半綠蘿函闕真相玉嵯峨誰言仙道求難至

自愧陰功積未多，渺渺雲霞開絳節。  
雖雖鸞鳳答空歌，幾時身退瓊壇畔。  
榮利匆匆奈老何。

寄餘杭全安石段少連二從事

分攜俱是佐高牙，兩地光塵自等差。  
榮事日趨丞相府，道情時過老君家。  
雙鴻得侶知風便，一鶴思鳴對露華。  
早晚相將雲漢外，重為龍友免天涯。

送江南運使張傳度支

刑措東南始詔迴，重分邦計命欽哉。  
于公已積充閭慶。



蕭相還施富國才十郡甘棠歌未歇一方流馬路初開  
啟心知有嘉謨在足亂雲霓憶帝臺

堯廟

千古如天日巍巍與善功禹終平泮水舜亦致薰風江  
海生靈外乾坤揖讓中鄉人不知此簫鼓謝年豐

西溪見牡丹

陽和不擇地海角亦逢春憶得上林色相看如故人

寄秦州幕明化基寺丞

同時辟命新中道改絲綸滄海人歸楚清風子在秦共  
居卿月下獨得將星隣聳動軍前檄崢嶸席上珍烽烟  
邊信息金鼓武精神獵度天山雪歌逢隴樹春燕臺無  
限好西向自霑巾

鵬鷄在秋天

秋漢寥寥迴雄心肯木棲人間正搖落天外絕攀躋月  
兔精應喪陽鳥影欲齊長河匹練小太華一拳低下晒  
羣毛遁橫過百鳥睽垂風俊未已空濶玉關西

觀獵

鷹犬一何驕，霜明遠近郊。  
鸞皇不觸網，狐兔自充庖。  
熠熠流鳴鏑，紛紛過綠髯。  
雄飛侵漢下，殺氣與雲交。  
翦棘爭探穴，摧林競覆巢。  
惟開三面者，盛德播絃匏。

鸚鵡

堂上每云云，金籠久受恩。  
思山誠有意，對主忍無言。  
性比孤鸞潔，聲殊百舌繁。  
雲林如一去，應喜謝朱門。

歸鴈

稻粱留不得一一起江天帶雪南離楚和春北入燕依  
依前伴侶歷歷舊山川木葉程猶遠梅花信可傳子規  
啼到曉鸚鵡鎖經年應羨冥冥者東風羽翼全

青郊

青郊鳴錦雉綠水漾金鱗願得郢中客共歌臺上春

射陽湖

渺渺指平湖烟波極望初縱橫皆釣者何處得嘉魚

舟中

珠彩耀前川歸來一扣舷微風不起浪明月自隨船  
寄歐靜秀才

君歸一水遙魂斷木蘭橈賴有南軒竹清風慰寂寥  
和韓布殿丞三首

泛湖中

平湖萬頃碧謝客一開顏待得臨清夜徘徊載月還  
琴酒

絃上萬古意樽中千日醇清心向流水醉貌發陽春

漁父

月色滿滄波吾生樂事多何人獨醒者試聽濯纓歌

送識上人遊金山寺

空半簇樓臺紅塵安在哉山分江色破潮帶海聲來煙  
景諸隣斷天光四望開疑師得仙去白日上蓬萊

野色

非煙亦非霧幕幕映樓臺白鳥忽點破夕陽還照開肯  
隨芳草歇疑逐遠帆來誰謂山公意登高醉始迴

雜詠四首

梓人一笑白雲鄉  
杞桂森森遇豫章  
聞道周公繩墨在  
天庭誰此議明堂

有客藍田得意歸  
溪光冉冉白虹蜺  
玉人豈忍言環珮  
留取天王尺二圭

鏗鏗千古嶧山桐  
金石聲來造化中  
誰道元和無復致  
為君堂上起薰風

嶺上英英向日開  
帝鄉情態自徘徊  
如何一施陽春雨

依舊無心歸去來

書事呈韓布殿丞

南宮曾薦牧之文，失足徒勞忽十春。  
天上雲龍期際會，山中猿鶴愧因循。  
無功豈不孤黃石，有道何堪憶紫萼。  
少壯由來須努力，篆銘鍾鼎古何人。

西溪書事

卑棲曾未託椅梧，敢議雄心萬里途。  
蒙叟自當齊黑白，子牟何必怨江湖。  
秋天響亮頻聞鶴，夜海腫隴每見珠。



一醉一吟疎嬾甚溪人能信解朝無

得李四宗易書

秋風海上憶神交江外書來慰寂寥  
松柏舊心當化石  
塤箎新韻似聞韶須期管鮑垂千古  
不學張陳負一朝  
三復荊州無限意王孫芳草路遙遙

歐伯起相訪

海涯牢落若為懷惟子相過未忍迴  
勁草不隨風偃去  
孤桐何意鳳飛來  
罇藏金醴遲遲進匣鎖雲和特特開

萬古功名有天命浩然攜手上春臺

寄贈林逋處士

唐虞重逸人束帛降何頻風俗因君厚文章至老淳  
玉田耕小隱金闕夢高真罷釣輪生蠹慵冠鑑積塵餌蓮  
攀鶴頂歌雪扣琴身墨妙青囊秘丹靈綠髮新嶺霞明  
四望巖筍入諸隣幾姪簪裾盛諸生禮樂循朝廷唯薦  
鶚鄉黨不傷麟弔古夫差國懷賢伍相津劇談來劍俠  
騰嘯駭山神有客瞻冥翼無端預薦紳未能忘帝力猶

待補天均早晚功名外孤雲可得親

酬滕子京同年

謝家風雅若為酬散吏方耽海上游疎嬾幾忘傳筆夢  
寂寥仍有負薪憂欲歌蘭雪歸真隱敢向簪軒競急流  
如共茂先瞻氣象莫言神物在南州

贈餘杭唐異處士

名動公卿四十秋相逢仍作旅人遊青山欲買難開口  
白髮思歸易滿頭厭入市廛如海燕可堪雲水屬江鷗

故鄉知己方都督千樹春濃種橘休

時胡侍郎  
守餘杭

和沈書記同訪林處士

山中宰相下巖扃靜接遊人笑傲行  
碧嶂淺深驕晚翠  
白雲舒卷看春晴  
煙潭共愛魚方樂  
樵爨誰欺鴈不鳴  
莫道隱君同德少  
樽前長揖聖賢清

原本看字  
作戲字

諸暨道中作

林下提壺招客醉  
溪邊杜宇勸人歸  
可憐白酒青山在  
不醉不歸多少非

題翠峯院

范蠡  
舊宅

翠峯高與白雲閒  
吾祖曾居水石間  
千載家風應未墜  
子孫還解愛青山

與人約訪林處士阻雨因寄

閒約諸公扣隱扃  
江天風雨忽飄零  
方憐春滿王孫草  
可忍雲遮處士星  
蕙帳未容登末席  
蘭舟無賴寄前汀  
湖山早晚逢晴霽  
重待尋仙入翠屏

寄西湖林處士

蕭索遶家雲清歌獨隱淪巢由不願仕堯舜豈遺人一  
水無涯靜羣峯滿眼春何當伴閒逸嘗酒過諸隣

越上聞子規

夜入翠煙啼晝尋芳樹飛春山無限好猶道不如歸

送李紘殿院赴闕二首

寂寥門巷每相過親近賢人所得多今日九重天上去  
睢陽孤客奈愁何

霜露丘園不忍違三年月日速如飛金門乍入應垂淚

因挂朝衣憶彩衣

送邢昂處士南遊

落落崆峒一大儒  
四方心逸憶江湖  
東南賴有林君復  
萬里清風去不孤

送丁司理赴明州

仙家枝葉令威孫  
南去司刑庇越民  
金闕道書微旨在  
獄多陰德是真人

道書謂升真者  
皆須曾為獄官

送鄞江竇尉

片帆飛去若輕鴻一霎春潮過浙東  
王謝江山久蕭索  
子真今為起清風

送常熟錢尉

姑蘇臺下水如藍天賜仙鄉奉旨甘  
梅淡柳黃春不淺  
王孫歸思滿江南

試筆

偶緣疎拙得天真豈問前途屈與伸  
車馬縱能欺倦客  
江山猶可助騷人  
懶如叔夜書盈几  
狂似淵明酒滿巾



況有南窓姬易在此心那更起纖塵

送真元二上人歸吳中

歸心不可奪千里故園春及見市朝事却思江海人煙  
波方得伴松月定為隣願結虎溪社休休老此身

寄題許州錢相公信美亭

華構高軒敞名湖一面分星辰居上相鼓吹燕中軍山  
色來嵩室風光徹汝墳杉篁涵晚翠蘭茝薦時薰坐嘯  
頻乘月歸懷幾望雲迴臨黃霸俗遠味仲宣文萬戶方

開國三階復致君斯亭比棠樹千載頌清芬

送何白節推宰晉原二首

盛府兼名邑榮歸指故林多年望鄉淚萬里倚門心江  
館春寒薄山程晚翠深板輿迎侍日桃李正芳陰

此行深惜別所喜是寧親祖帳千門曉鄉關錦國春烏  
歌疑勸酒山態似迎人我絕南陔望因兄淚滿巾

送刁紉戶掾太常下第

時為太常  
發解官

精鑒本非深英僚暫此沉火炎方試玉沙密偶遺金豈

累青雲器猶孤白雪音敢希蘇季子潛有激儀心

憶杭州西湖

長憶西湖勝鑑湖春波千頃綠如鋪  
吾皇不讓明皇美可賜疎狂賀老無

寄林處士

片心高與月徘徊豈為千鍾下釣臺  
猶笑白雲多事在等閒為雨出山來

依韻酬母提推官

聖門非入室文陣敢爭盟不意棲雲閣何才隸月卿珍  
羣憐未至霄鷄引脩程直舍有仙味祕庭無俗聲午陰  
宮樹綠宵刻禁鍾清奉制歌三秀稱觴聽六英恩輝孤  
易感交結淡難成新髮鑑中改舊山天際橫纓思漁父  
濯春伴隼旗行桃浪觀秦塞薰風省舜城幾多興廢跡  
重疊古今情進退思先覺蹉跎畏後生見詒如美袞欲  
報乏英瓊淨揖澄江練高窺擢露莖復驚聞正始終仰  
輔登閔好勵圖南志翱翔覽四瀛

送石曼卿

河光嶽色過秦關英氣飄飄酒滿顏  
賈誼書成動西漢  
謝安人笑起東山  
亨途去覺雲天近  
舊隱回思水石閒  
此道聖朝如不墜  
疏封宜在立譚間

送何涉秀才

蜀道歸來萬里身  
上堂嘉慶動諸隣  
賢良詔下先生起  
休向成都問卜人

八月十四夜月

光華豈不盛賞宴尚遲遲天意將圓夜人心待滿時已  
知千里共猶訝一分虧來夕如澄霽清風不負期

送吳安道學士知崇州

一麾輕去奉蘭羞共惜清賢豈易求  
筮易暗驚鳴鶴遠賦詩深望白駒留  
古來經緯心皆曉閒處光陰髮半秋  
長孺之才同吏隱相寬頻上海邊樓

時聶長孺  
倅通判

謫守睦州作

重父必重母正邦先正家一心回主意十口向天涯銅

虎恩猶厚鱸魚味復佳  
聖明何以報沒齒願無邪

赴桐廬郡淮上遇風三首

聖宋非強楚清淮異汨羅  
平生仗忠信盡室任風波  
舟楫顛危甚蛟黿出沒多  
斜陽幸無事沽酒聽漁歌

妻子休相咎勞生險自多  
商人豈有罪同我在風波  
一棹危於葉傍觀亦損神  
他時在平地無忽險中人

送韓瀆殿院出守岳陽

仕宦自飄然君恩豈欲偏  
纔歸劍門道忽上洞庭船  
墜

絮傷春日春濤廢夜眠岳陽樓上月清賞浩無邊

出守桐廬道中十絕

隴上帶經人金門齒劍臣雷霆日有犯始可報君親  
君恩泰山重爾命鴻毛輕一意懼千古敢懷妻子榮  
妻子屢牽衣出門投禍機寧知白日照猶得虎符歸  
分符江外去人笑似騷人不道鱸魚美還堪養病身  
有病甘長廢無機苦直言江山藏拙好何敢望天閭  
天閭變化地所好必真龍軻意正迂闊悠然輕萬鍾



萬鍾誰不慕意氣滿堂金必若枉此道傷哉非素心  
素心愛雲水此日東南行笑解塵纓處滄浪無限清  
滄浪清可愛白鳥鑑中飛不信有京洛風塵化客衣  
風塵日已遠郡枕子陵溪始見神龜樂優優尾在泥  
蕭灑桐廬郡十絕

蕭灑桐廬郡烏龍山靄中使君無一事心共白雲空  
蕭灑桐廬郡開軒即解顏勞生一何幸日日面青山  
蕭灑桐廬郡全家長道情不聞歌舞事遶舍石泉聲

烏龍

山泉實

過公署

蕭灑桐廬郡公餘午睡濃人生安樂處誰復問千鍾

蕭灑桐廬郡家家竹隱泉令人思杜牧無處不潺湲

蕭灑桐廬郡春山半是茶新雷還好事驚起雨前芽

蕭灑桐廬郡千家起畫樓相呼採蓮去笑上木蘭舟

蕭灑桐廬郡清潭百丈餘釣翁應有道所得是嘉魚

此郡

魚少

而嘉

蕭灑桐廬郡身閒性亦靈降真香一炷欲老悟黃庭

蕭灑桐廬郡嚴陵舊釣臺江山如不勝光武肯教來  
新定感興五首

數仞黃堂上題名僅百賢孤高宋開府千載可拳拳  
山水真名郡恩多補諫官中間好田錫風月亦盤桓  
風物皆堪喜民靈獨可哀稀逢賢太守多是謫官來  
去國三千里風波豈不賒迴思洞庭險無限勝長沙  
江上多嘉客清歌進白醪靈均良可笑終日著離騷

遊烏龍山寺

高嵐指天近遠溜出山遲萬事不到處白雲無盡時異  
花啼鳥樂靈草隱人知信是棲真地林僧半雪眉

江干閒望

江干日清曠寓目一搯筇落葉信流水歸雲識舊峯蘭  
蓀誰共采鳬鴈自相從莫愛蘋風起波來千萬重

和章岷推官同登承天寺竹閣

僧閣倚寒竹幽襟聊一開清風曾未足明月可重來晚  
意煙垂草秋姿露滴苔佳賓何以佇雲瑟與霞杯

齋中偶書

狂愚多苦口幽遠獨甘心  
言路有餘責權門無去音  
忘憂曾扣易思古即援琴  
此意誰相和寥寥鶴在陰

留題江秀才舊居

結舍近滄洲江山不外求  
我來明月夜更得主人留  
依韻酬周駸太博同年

孰敢先懷富貴圖良時須惜幾  
嗟吁衆心可致巍巍主  
上意思平兩兩符不稱內朝裨  
耳目多慙外補救皮膚

子陵灘畔觀漁釣無限殘陽媚綠蒲

依韻荅胡侍郎見寄

千年風采逢明主一寸襟靈慕昔賢  
待看朝廷興禮讓天衢何敢鬪先鞭

桐廬郡齋書事

千峯秀處白雲驕吏隱雲邊豈待招  
數仞堂高誰富貴一枝巢隱自逍遙  
杯中好物間宜進林下幽人靜可邀  
莫道官清無歲計滿山芝朮長靈苗

留題方干處士舊居

某景祐初典桐廬郡有七里瀨子陵之釣臺在而乃  
以從事章岷往構堂而祠之召會稽僧悅躬圖其像  
於堂洎移守姑蘇道出其下登臨徘徊見東嶽絕碧  
白雲徐生云方干處士之舊隱遂訪焉其家子孫尚  
多儒服有楷者新策名而歸因留二十八言又圖處  
士像於嚴堂之東壁楷請刊詩于其左

風雅先生舊隱存子陵臺下白雲村唐朝三百年冠蓋

誰聚詩書到遠孫

時裔孫楷方  
登進士科

范文正集卷三



欽定四庫全書薈要卷一萬四千二百二十九

集部

范文正集卷四

宋 范仲淹 撰

律詩

依韻酬章推官見贈

姑蘇從古號繁華，却戀巖邊與水涯。  
重入白雲尋釣瀨，更隨明月宿詩家。  
山人驚戴烏紗出，溪女笑偎紅杏遮。  
來蚤又拋泉石去，茫茫榮利一吁嗟。

蘇州十詠

泰伯廟

至德本無名宣尼一此評能將天下讓知有聖人生南  
國奔方遠西山道始亨英靈豈不在千古碧江橫

木蘭堂

堂上列歌鐘多慙不如古却羨木蘭花曾見霓裳舞

樂白

天為蘇州刺史  
嘗教此舞

洞庭山

吳山無此秀乘暇一遊之萬頃湖光裏千家橘熟時平  
看月上早遠覺鳥歸遲近古誰真賞白雲應得知

虎丘山

昔見虎耽耽今為佛子巖雲寒不出寺劍靜未離潭幽  
步蘿垂徑高禪雪閉菴吳都十萬戶煙瓦亘西南

閶門

吳門聳閶闔迎送每躋攀一水帝鄉路片雲師子山落  
鴻漁釣外斜柳別離間白傳歸休處盤桓幾厚顏

靈巖寺

吳王之離宮  
也下臨太湖

古來興廢一愁人  
白髮僧歸掩寺門  
越相煙波空去鴈  
吳王宮闕半啼猿  
春風似舊花猶笑  
往事多遺石不言  
唯有延陵逃遁去  
清名高節滿乾坤

太湖

有浪即山高無風還練靜  
秋宵誰與期月華三萬頃

伍相廟

胥也應無憾至哉忠孝門  
生能酬楚怨死可報吳恩直

氣海濤在片心江月存悠悠當日者千載祇慙魂

觀風樓

高壓郡西城觀風不浪名山川千里色語笑萬家聲碧  
寺煙中靜紅橋柳際明登臨豈劉白滿目見詩情

南園

西施臺下見名園百草千花特地繁欲問吳王當日事  
後來桃李若為言

依韻奉酬晏尚書見寄

徽音來景亳盛事聳吳鄉上象三台照高文五色章純  
如登樂府淵若測天潢寒谷春重煦幽宮草特芳感知  
心似血思報鬢成霜新定慙無惠姑蘇惜未康堯湯餘  
水旱劉白舊風光北闕雲霓遠南園橘柚荒願聞歌畫  
一敢議賦長楊碌碌朝須解循循教弗忘跡甘榮路外  
情寄聖門傍幾託為魚夢江湖尚渺茫

又用前韻謝晏尚書以近著示及

祖述賢人業何因降互鄉周公舊才美夫子近文章逸

氣彌衝斗雄源甚決潢月中靈桂老春外寶芝芳遠似

天無翳清如塞有霜日星圖舜禹金石頌成康

謂真廟神御頌

也

渦曲風騷盛

謂游渦之作也

營丘學校光

謂青社州學記也

至精含

變化大手鑿洪荒崧嶽詞欺甫甘泉價掩揚滿朝當諷

誦終古豈遺忘恍若探龍際森疑履虎傍半生游此道

觀海特茫茫

### 陳質殿丞挽歌詞

賢者逝如斯皇天豈易知衆人皆墮淚君子欲安碑幾

世傳清白滿鄉稱孝慈賢哉生令嗣遺秀在蘭芝

送僧文光

一品山前識迢迢三十春多慚畫戟裏重見白雲人

依韻酬府判龐醇之見寄

二十年前已定交而今鵬鷗各逍遙但能賈傳親前席  
何必蕭生意本朝直節羨君如指佞孤根憐我異凌霄  
凌霄花名  
生且有託莫將富貴移平昔彼此清心髮半凋

依韻酬吳安道學士見寄



聖君賢相正彌綸諫諍臣微敢徇身但得葵心長向日  
何妨鷲足未離塵豈辭雲水三千里猶濟瘡痍十萬民  
宴坐黃堂愧無限隴頭元是帶經人

依韻酬吳春卿二首

來章有鶴羸松冷之句  
因以松鶴命題以答之

鶴

華亭孤立病時身終日徘徊尚海濱露掌思高還警夜  
芝田音斷欲傷春千年靈氣何求藥八變竒姿已過人  
莫厭在陰猶寡和九臯非晚見精神

松

亭亭百尺棟梁身寂寞雲根與澗濱  
寒冒雪霜寧是病  
靜期風月不須春  
蕭蕭遠韻和於樂  
密密清陰意在人  
高節直心時勿伐  
千秋為石乃知神

應制賞花釣魚

萬彙嘉亨日  
皇心豫宴辰  
華林新濯雨  
靈沼正涵春  
帝幄紛仙藹  
天鈎擲錦鱗  
洋洋頌睿唱  
賡頌決簪紳

過餘杭白塔寺

登臨江上寺遷客特依依  
遠水欲無際孤舟曾未歸  
亂峯藏好處幽鷺得閒飛  
多少天真趣遙心結翠微

西湖筵上贈胡侍郎

官秩文昌貴功名信史褒  
朝廷三老重鄉黨二疏高  
涯業盡圖籍子孫皆俊髦  
西湖天下絕今日盛遊遨

江城對月

南國風波遠東門冠蓋回  
多情是明月相逐過江來

送向綜國博通判桂州

通籍三公後監州五嶺深欲知明主意將慰遠人心歲  
計多藏藥舟行不廢琴歸書清白最寧問橐中金

芝山寺

樓殿冠崔嵬靈芝安在哉雲飛過江去花落入城來得  
食鵝朝聚聞經虎夜回偶臨西閣望五老夕陽開

昇上人碧雲軒

愛此詩家好幽軒絕世紛澄宵半床月淡曉數峯雲遠  
意經年就微吟並舍聞只應虛靜處所得自蘭芬

郡齋即事

三出專城鬢似絲  
齋中蕭灑過

一作勝

禪師近疎歌酒緣

多病不負雲山賴  
有詩半雨黃花秋  
賞健一江明月夜  
歸遲世間榮辱何  
須道塞上衰翁也  
自知

同年魏介之會上作

寒苦同登甲乙科  
天涯相對合如何  
心存闕下還憂畏  
身在樽前且笑歌  
閒上碧江游畫鷁  
醉留紅袖舞鳴鼉  
與君今日真良會  
自信麤官樂事多

依韻酬黃灝秀才

再貶鄱川信不才子規相愛勸歸來客心但感江山助  
天意難期日月迴白雪孤琴彌冷淡浮雲雙闕自崔嵬  
南方歲晏猶能樂醉盡黃花見早梅

贈鍾道士

曾舉進士

人間無復動機心掛了儒冠歲已深惟有詩家風味在  
一壇松月伴秋吟

道士程用之為余傳神因題

貌古神疎畫本難因師心妙發毫端無功可上凌煙閣  
留取雲山靜處看

送魏介之江西提點

旌旗如火浪如鷗一路春城次第遊江上高樓欲千尺  
便從今日望歸舟

遊廬山作

五老閒遊倚舳艫碧梯嵐迳好程途雲開瀑影千門掛  
雨過松黃十里鋪客愛往來何所得僧言榮辱此間無

從今愈識逍遙旨一聽升沉造化鑪

瀑布

迴與衆流異發源高更孤下山猶直在到海得清無勢  
鬪蛟龍惡聲吹雨雹麤晚來雲一色詩句自成圖

贈廣宣大師

憶昔同遊紫閣雲別來三十二迴春白頭相見雙林下  
猶是清朝未退人

移丹陽郡先遊茅山作



丹陽太守意何如先謁茅卿始下車  
竭節事君三黜後收心奉道五旬初  
偶尋靈草逢芝圃欲叩真關借玉書  
不更從人問通塞天教吏隱接山居

贈茅山張道者

有客生平愛白雲無端年老尚紅塵  
只應金簡名猶在得見仙巖種玉人

京口即事

突兀立孤城詩中別有情地深江底過  
日大海心生甘

露樓臺古金山氣象清六朝人薄命不見此昇平

懷慶朔堂

慶朔堂前花自栽便移官去未曾開年年憶著成離恨

只託春風管勾來

拾遺句  
作幹

依韻酬葉道卿中秋對月二首

天遣今宵無寸雲故開秋碧掛冰輪詩人不悔衣霑露  
為惜清光豈易親

孤光千里與君逢最愛無雲四望通處處樓臺競歌宴

的能愛月幾人同

贈葉少卿

退也天之道東南事了人風波拋舊路花月伴閒身湖  
外扁舟遠門中駟馬新心從今日泰家似昔時貧見子  
登西掖攜孫過北隣白雲高閣曙淥水後池春樽酒呼  
前輩鑪香叩上真只應陰德在八十富精神

依韻答梁堅運判見寄

蔽野旌旗色滿山笳吹聲功名早晚就裴度亦書生

城大順迴道中作

三月二十七羌山始見花將軍了邊事春老未還家

依韻和延安龐龍圖柳湖

種柳穿湖後延安盛可遊遠懷忘澤國真賞即瀛洲江  
景來秦塞風情屬庾樓劉琨增坐嘯王粲乍銷憂秀發  
千絲墮光搖匹練柔雙雙翔乳鷺兩兩睡馴鷗折翠贈  
歸客濯清招隱流宴回銀燭夜吟度玉關秋勝處千場  
醉勞生萬事浮王公多雅故

某與龍圖公同年  
復為延安交政

思去共

仙舟

和延安龐龍圖寄岳陽滕同年

優游滕太守郡枕洞庭邊  
幾處雲藏寺千家月在船  
疎鴻秋浦外長笛晚樓前  
旋撥醅頭酒新魚縮項鱸  
宦情須淡薄詩意定連縣  
迴是偷安地仍當飽事年  
只應天下樂無出日高眠  
豈信憂邊處胡兵隔一川

時宣撫  
寄嵐軍

與張燾太博行忻代間因話江山作

數年風土塞門行說着江山意暫清  
求取罷兵南國去

滿樓蒼翠是平生

過長安醉別資政鄭侍郎

鄉關交復親把酒且逡巡  
共上青雲路相看白髮人有  
為須報國無事即頤神  
故素幾云在風音莫厭頻

依韻酬光化李簡夫屯田

老來難得舊交游莫歎樽前兩鬢秋  
少日苦辛名共立晚年恬退語相投  
龔黃政事聊牽強元白隣封且唱酬  
附郭田園能置否與君乘健早歸休

依韻酬太傅張相公見贈

出處曾無致主功  
南陽為守地猶雄  
醉醒往日慙漁父  
得失今朝賀塞翁  
七里河邊歸帶月  
百花洲上嘯生風  
卧龍鄉曲多賢達  
願預逍遙九老中

依韻酬益利鈐轄馬端左藏

濫登清顯遇公朝  
豈有才謀可致堯  
拙守自慙成木強  
宦遊誰歎僅蓬飄  
醉來多謝提壺勸  
歸去寧煩杜宇招  
好樂當年開口笑  
此心無事愧重霄

依韻酬邠州通判王稷太博

南豳日日接英標公外追隨豈待招惡勸酒時圖共醉  
痛羸暴處肯相饒一拋言笑如何遣頻得音書似不遙  
獨上西樓為君久滿城明月會雲銷

依韻酬李光化見寄

南陽偃息養衰顏天暖風和近楚關欲少禍時當止足  
得無權處始安閒心憐好鳥來幽院目送微雲過別山  
此景此情聊自慰是非何極任循環



寄安素高處士

吏隱南陽味日新  
幕中文雅盡嘉賓  
滿軒明月清譚夜  
共憶詩書萬卷人

酬李光化見寄二首

交親莫笑出麾頻  
不任織機只任真  
遠護玉關猶竭力  
入陪金鉉敢周身  
素心直擬圭無玷  
晚節當如竹有筠  
道本逍遙惟所適  
吾生何用獲求伸

萬里承平堯舜風  
使君尺素本空空  
庭中無事吏歸早

野外有歌民意豐石鼎鬪茶浮乳白海螺行酒灩上聲波  
紅宴堂未盡嘉賓興移下秋光月色中

依韻酬李光化敘懷

列宿專城且自娛清名善最即前塗江山樂國誠難會  
風月詩家的不辜未必晚成輸早達好將高笑代長吁  
公餘更勵經邦業思為清朝贊禹謨

和李光化秋詠四首

曉

牆外轆轤響樓前河漢歌曙光和月色猶記早朝時

晝

日色清如照前林葉未零海東新隼至一點在青冥

晚

晚色動邊思去年猶未歸戍樓人已冷目斷望征衣

夜

春色人皆醉秋光獨不眠君看明月下何似落花前

送黃顥員外

三十餘年交舊心相逢那復議升沉  
卑飛塵土味誠薄  
達宦風波憂更深  
自古榮華渾一夢  
即時歡笑敵千金  
追陪未久還離索  
早晚軒車重見尋

和并州大資政鄭侍郎秋晚書事

太原兵重壓強胡  
莫對秋風憶鱸  
萬里天聲揚紫塞  
十年人望在黃樞  
定應松柏心無改  
自信雲龍道不孤  
應笑病夫何所補  
獨能安坐養桑榆

和提刑趙學士探梅三絕

蕭條醵後復春前  
雪壓霜欺未放妍  
昨日倚欄枝上看  
似留芳意入新年

靜映寒林晚未芳  
人人欲看壽陽粧  
玉顏須傍韶春笑  
莫鬪嚴風與惡霜

百花爭早孰過梅  
天與芳時豈待催  
莫惜黃金置清賞  
隔年春色為君開

和太傅鄧公歸遊武當見寄

三提相印代天工  
鄧國歸來耀本封  
此日神仙丁令鶴

幾年霖雨武侯龍酬恩定得祠黃石談道須期會赤松  
莫慮故鄉陵谷變武當依舊碧重重

即席呈太傅相公

鳳池三入冠台躔致了昇平一品閒白傳歌詩傳海外  
晉公桃李滿人間上都雲遠經時別故國春濃幾度還  
太史占天應有奏壽星光彩近南山

紀送太傅相公歸闕

搢紳誰敢望差肩獨向昌期協半千首會雲龍游少海

親扶日月上中天碧油兩就元戎鎮黃閣三提冢宰權  
坐致唐虞成大化退居師傅養高年閒披丹訣開鑪竈  
醉度清歌被管絃同榜幾人登將相滿朝今日羨神仙  
松楸薙草思純孝里巷揮金過昔賢歸赴誕辰知兌說  
輕安拜舞壽觴前

依韻和提刑張太傅寄梅

數枝梅寄寂寥人多謝韶華次第均穰下此花留未發  
待君同賞後池春

又和賞梅

故人為使富天才相與抽毫賦早梅  
氣豔未勞橫玉笛  
風光先合倒金罍  
隴頭欲寄交情遠  
林下初逢病眼開  
必若和羹有遺味  
花王應亦命公台

依韻答王源叔憶百花洲見寄

芳洲名冠古南都  
最惜塵埃一點無  
樓閣春深來海鷺  
池塘人靜下仙鳬  
花情柳意憑誰問  
月彩波光豈易圖

漢上山公發新詠  
許昌何必詫申湖

申或作西



獻百花洲圖上陳州晏相公

穰下勝遊少此洲聊入詩百花爭窈窕一水自連漪  
潔白憐翹鷺優游羨戲龜闌干紅屈曲亭宇碧參差  
倒影澄波底橫煙落照時月明魚競躍春靜柳閒垂  
萬竹排

霜仗千荷卷翠旗菊分潭上近

菊花潭在郡之西郊因有菊潭門復有菊潭鎮近取

菊植于洲中洲有高臺遂命之曰菊臺

梅比漢南遲

京洛而南至鄧始有梅馬梅比襄陽又晚

一岸鵲依人喜汀鷗不我疑綵絲穿石節

襄鄧間舊俗正月二十二

日士女游河取小石通中者用綵絲穿之帶以為祥

羅襪踏青期素髮頻來醉滄

浪減去思步隨芳草遠歌逐畫船移繪寫求真賞緘藏  
獻已知相君那肯愛家有鳳皇池

依韻答青州富資政見寄

樞府當年日贊襄隱然一柱在明堂親逢英主開前席  
力與皇家正舊章直道豈求安富貴純誠惟欲助清光  
龔黃政事追千載齊魯風謠及萬箱偉望能令中國重  
奇謀曾壓北方強故人待看調元後乞取優游老洛陽

依韻答并州鄭大資政見寄

制節重并汾淹留又見春年高成國老道在樂天真風  
韻應如舊精明迴絕倫致君心未展寧是式微人

過陳州上晏相公

曩由清舉玉宸知今覺光榮冠一時曾入黃扉陪國論  
重求絳帳就師資談文講道渾無倦養浩存真絕不衰  
獨媿鑄顏恩未報捧觴為壽獻聲詩

和運使舍人觀潮二首

何處潮偏盛錢唐無與儔誰能問天意獨此見濤頭海

浦吞來盡江城打欲浮勢雄驅島嶼聲怒戰貔貅萬疊  
雲纔起千尋練不收長風方破浪一氣自橫秋高岸驚  
先裂羣源怯倒流騰凌大鯢化浩蕩六鼇遊北客觀猶  
懼吳兒弄弗憂子胥忠義者無覆巨川舟

把酒問東溟潮從何代生寧非天吐納長逐月虧盈暴  
怒中秋勢雄豪半夜聲堂堂雲陣合屹屹雪山行海面  
雷霆聚江心瀑布橫巨防連地震羣檝望風迎踊若蛟  
龍鬪奔如雨雹驚來知千古信迴見百川平破浪功難

敵驅山力可并伍胥神不泯憑此發威名

依韻和蘇州蔣密學

餘杭偶得借麾來山態雲情病眼開此樂無涯誰可共

詩仙今日在蘇臺

白樂天謂韋蘇州為詩仙

依韻和孫之翰對雪

江干往往臘不雪今喜紛紛纔孟冬廼知王澤寢及遠  
益明天意先在農有年預可慰四海大瑞且當聞九重  
況此湖山滿清思與君交唱若為慵

依韻和并州鄭宣徽見寄二首

錢塘作守不為輕況是全家住翠屏名品久參卿士月  
部封全屬斗牛星仁君未報頭先白故老相看眼倍青  
最愛湖山清絕處晚來雲破雨初停

西湖載客恣游從湖上參差半佛宮迴顧隙駒曾不息  
沉思樽酒可教空層臺累榭皆清曠萬戶千門盡鬱蔥  
向此行春無限樂却慙何道繼文翁

依韻答蔣密學見寄

東南為守慰衰顏憂事渾祛樂事還鼓吹夜歸湖上月  
樓臺晴望海中山奮飛每羨冥鴻遠馳騁那慙老驥閑  
此日共君方偃息是非榮辱任循環

依韻和同年朱兵部王賓客交贈之什

鶴禁蘭宮達了身高居南闕重為隣西園冠蓋時時會  
北海樽壘日日親共棄榮華拋世態同歸清靜復天真  
一如劉白東都下更得裴公作主人

登表海樓

一帶林巒秀復奇  
每來凭檻即開眉  
好山深會詩人意  
留得夕陽無限時

石子澗二首

鑿開奇勝翠微間  
車騎笙歌暮未還  
彥國才如謝安石  
他時即此是東山

飛泉落處滿潭雷  
一道蒼然石壁開  
故老相傳應可信  
此山雲出雨須來

依韻答韓侍御



雖叨世契與隣藩東道瞻風御史尊鄭館昔時延下客

子執卷時即遊端公之門

于家今日見高門

端公之先君嘗作金陵獄掾

我居方

面榮為懼君向臺端直且溫彼此中懷蘊金石不須銷黯動離魂

### 謝柳太博惠鶴

新詩遺鶴指真經對此仙標詎敢輕萬里華亭思去伴  
千年遼海識歸程雞羣與處曾非辱鵬路將翔孰謂榮  
獨愛九臯嘹唳好聲聲天地為之清

知府孫學士見示和終南監宮太保道懷五首

因以綴篇

玉皇近侍請脩真  
賜得南山十里雲  
樽有聖賢聊自慰  
鼎多龍虎復誰分  
謝家山色朝晡見  
陶隱松風寤寐聞  
萬物已齊無一事  
獨醒惟笑衆醺醺

要路拋來自寡尤  
高懷卷去白雲收  
玉緣祕寶須藏密  
蘭為奇香却在幽  
仙骨豈曾移靜節  
帝心終是竭嘉猷  
紅霞綠竹忘機地  
未免天家下詔求

漢陂高興自飄飄何必天台渡石橋潭上藥靈多餌菊  
林間詩逸半書蕉勤歌蘭珮招逋隱懶事塵纓逐案僚  
客有赤松盟約在異時猿鶴不相遼

瑤壇日月靜中長詩思時時逸謝塘神枕自成仙島夢  
朝衣猶有御爐香三元祕簡侵星奏五嶺靈芽待雪嘗  
金闕九重留不住高風何處是嚴光

門外煙嵐紫閣橫九衢風土更何情籬邊醉傲淵明飲  
隴上歌隨桀溺耕三樂放懷千古重萬鍾回首一毫輕

鵬鷯共適逍遙理誰復人間問不平

贈方秀才

楷

高尚繼先君  
品居與俗分  
有泉皆漱石  
無地不生雲  
隣里多垂釣  
兒孫半屬文  
幽蘭在深處  
終日自清芬

依韻和龐殿院見寄

吳門歟歲減繁華  
蕭索專城未足誇  
柳色向秋迎使館  
水聲終夜救田車  
丘山在負思朝寄  
毫髮經心愧道家  
不似桐廬人事少  
子陵臺畔樂無涯



范文正集卷四

謹案卷三第十五頁後三行金門齒劍臣刊本劍作諫據校宋本改

卷四第五頁前二行何妨驚足未離塵刊本驚訛驚據時兆文本改


第六頁前四行鄉黨二疏高刊本疏訛踈案此用漢書疏廣疏受事今據改

第六頁後四行樓殿冠崔嵬刊本冠訛觀據時兆文本改

金史四  
第十七頁前五行因有菊潭門刊本脫潭字謹遵  
御選宋詩增

第二十二頁後三行高尚繼先君刊本高尚二字  
誤倒據時兆文本改正





總校官庶吉士臣侍朝

校對官編修臣沈清藻

謄錄監生臣張起隆

欽定四庫全書薈要

集部

范文正集卷五

六

詳校官助教臣常循



欽定四庫全書薈要卷一萬四千二百二十

集部

范文正集卷五

宋 范仲淹 撰

義

易義



乾上乾下内外中正聖人之德位乎天之時也德內也  
位外也九二君之德九五君之位成德于其內充位于  
其外聖人之德居乎誠而不遷有時舍之義故曰見龍

在田德昭于中故曰利見大人天下文明君德也聖人  
之位行乎道而不息有時乘之義故曰飛龍在天位正  
於上故曰利見大人乃位乎天德於是乎位矣或者泥  
於六位之序止以五為君曾不思始畫八卦三陽為乾  
君之象也豈俟於五乎三陰為坤臣之象也豈俟於四  
乎震為長子豈俟重其卦而始見於長子乎明夫乾君  
之象既重其卦則有内外之分九二居乎内德也九五  
居乎外位也餘爻則從其進退安危之會而言之非必

自下而上次而成之也如卦言六龍而九三不言龍而  
言君子蓋龍無乘剛之義則以君子言之隨義而發非  
必執六龍之象也故曰易無體而聖人之言豈凝滯於  
斯乎

咸陰進而陽降

兌陰卦  
艮陽卦

上下交感之時也與泰卦近焉

泰卦天地交而萬物通咸  
卦天地感而萬物化生

然則泰卦三陰進于上三陽

降于下極於交而泰矣故曰萬物通咸卦陰進而未盡

達也陽降而未盡下也

下卦猶有二陰  
上卦猶有二陽

感而未至于泰

矣故曰萬物生而猶未通也聖人感人心而天下和平  
是感之無窮而能至乎泰者也感而不至其道乃消故  
至騰口薄可知也

恒陽動陰順剛上柔下

震陽也剛動于上  
巽陰也柔順于下

上下各得其

常之時也天尊地卑道之常矣君處上臣處下理之常

矣

上陽卦天與君之道也  
下陰卦地與臣之道也

男在外女在內義之常矣

震為

長男巽  
為長女

天地君臣男女各得其正常莫大焉諸卦多以

有應為吉此卦六爻皆應而爻無元吉者何也夫吉於

應者相求以濟之時也常者上下各得其所之時矣故以剛柔皆應為常而不以獲應為吉是以士之常也在於已不在於人諸侯之常也在於政不在於隣天子之常也在於道不在于權故曰聖人久於其道而天下化成堯舜為仁終身而已矣其知常也哉

遯陰進陽退

二陰進之於內  
四陽退之于外

柔佞入而剛正出君子遯

去之時也夫柔勝於剛則小人制君子矣辱可逃乎柔未勝剛則君子辱可遠也未見制於小人焉此卦二陰

而四陽柔未勝剛小人始浸而長也君子知吉之先辨  
禍之萌思遠其時也可不遯乎故遯之為義尚乎遠也  
是以最在內者有遯尾之危最在外者有肥遯之利子  
曰知幾其神始可與言遯也已矣

大壯剛以震而陰摧

內剛外震  
二陰剝焉

君子威而小人黜政令

剛嚴之時也陽於陰為大也陽進陰退大者壯而小者  
喪矣夫雷在天上萬物以震威行天下萬邦以恐天地  
之壯見乎雷聖人之壯見乎威壯而不節於天下暴矣



壯其喪矣是以君子非禮弗履以保其壯也故九二九  
四以陽居陰體剛而處巽乃復獲乎貞吉餘爻皆不克  
全其壯也已

晉順而上行奉于文明

坤順也  
離明也

君子嘉遇顯進之時也

夫上無文明賢斯遁矣今文明麗于上君子可不進乎  
其進也柔順內融

內卦坤也有  
柔順之義

則上不拒其逼矣故曰

晝日三接也英華外著

外卦文明有  
英華之德

則衆不疑其行矣

故曰君子以自昭明德蓋明出地上如日之升君子當

其象也豈復昧哉其伊尹之時歟

明夷陰上明下其義病矣火入地中其光翕矣蔽賢傷善之時也夫文明在上則賢者遂進文明在下則善人用傷其商之末世耶君子用晦然後免於其難然則文王其不用晦乎何以嘗幽之耶文王蓋有國焉德加於人晦之難也故以文明入於難終以柔順而出矣箕子雖無政焉而最近於闇故自辱其身以晦其道然後乃免故文明在下難哉聖賢其猶病諸變斯時者惟九三

乎得其大首其湯武之事歟

家人陽正於外

謂五也

陰正於內

其二也

陰陽正而男女得

位君子理家之時也明乎其內禮則著焉

內卦明也

順乎其

外孝悌形焉

外卦順也

禮則著而家道正孝悌形而家道成

成必正也正必成也聖人將成其國必正其家一人之

家正然後天下之家正天下之家正然後孝悌大興焉

何不定之有故曰刑于寡妻以御于家邦然則正家者

貴閑其初也故初九有悔閑得其道乃首得悔亡至于

九五王假有家則天下化成故勿恤而吉也

睽火炎澤潤其性不同炎從上潤從下其道違而不接

物情睽異之時也陰陽不接而天地睽日月不接而晝

夜睽禮義不接而男女睽君臣不接而上下睽情類不

接而萬物睽夫然則天地萬物之理從何而亨乎故睽

之時義不可久也必變而通之合睽以成其化天地睽

也而陰陽合焉

其體睽  
其義合

晝夜睽也而日月交焉男女睽

也而禮義成焉上下睽也而君臣會焉萬物睽也而情

類聚焉夫未合之時體乖志疑動虞蹇難求援而濟者也故其爻皆以有援免至于上九睽極而通則說弧遇雨羣疑亡也

蹇止於險中險難在前未可進之時也觀其名與屯卦

近焉

屯亦難也

然則屯已動乎險中難可圖也蹇猶止乎險

中難未可犯也惟二為王臣

得位應五

君在險中而與已應

始可匪躬而往焉餘皆往蹇而弗濟君子藏器於身待時而動其庶幾乎

解動乎險外出險散否之時也小人為險君子乃否小人既退君子乃振故六五象曰君子有解小人退也是故天地否散雷雨並興聖賢否散慶施遂行武王發粟散財其有解之時也矣

損山澤通氣

艮為山  
兌為澤

其潤上行取下資上之時也夫陽

實也陰虛也下卦二陽上卦二陰取陽資陰以實益虛者也虛者反實則實者反虛矣然則下者上之本本固則邦寧今務於取下乃傷其本矣危之道也損之有時

民猶說也

兌為說

損之無時澤將竭焉

兌為澤

故曰川竭必

山崩此之象也無他下涸而上枯也百姓不足君孰與

足其斯之謂歟

益剛來而助柔損有餘而補不足

上卦陽多故曰有餘下卦陽少故曰不足

自上惠下之時也天道下濟品物咸亨聖人下濟萬國

咸寧益之為道大矣哉然則益上曰損損上曰益者何

也夫益上則損下損下則傷其本也是故謂之損損上

則益下益下則固其本也是故謂之益本斯固矣榦斯

茂矣源斯深矣流斯長矣下之益上則利有竭焉上之  
益下則因其利而利之何竭之有焉是故木以動也上木  
動涉大川而無患雷風與也上風下雷興萬物而無疆明益  
之道何往而不利哉

夬一陰處高而羣陽伐之以大制小以正黜邪之時也  
時皆剛正柔佞豈得而據乎夫君子道微之時法令常  
密而或失之者何也內有小人也小人道微之時法令  
常顯而無忌者何也內皆君子也此卦一柔而乘五剛



危可知矣五剛而決一陰易可知矣故揚于王庭而不忌賞罰明行之際歟舜舉八元而去四凶此其時矣

萃澤處於地

兌為澤  
坤為地

其流集矣上說下順其義親矣物

情和聚之時也上以說臨下下以順奉上上下下莫不聚

乎天地亨而萬物以類聚大人亨而天下以義聚觀其

所聚而天地萬物之情可見矣彖言剛中而應者取其

上下相應以成萃聚之義而已若夫萃天下者豈私其

應哉必也以虛受人然後能萃其天下故九五以大人

之位而匪孚者以其應之於一不能盡天下之誠惜哉  
無私則至矣

升地中生木其道上行君子位以德升之時也夫高以  
下為基本始生於地中其舉遠矣聖人日躋其德而至  
于大寶賢者日崇其業而至於公圭以順而升物不距  
矣故爻無凶咎初則大吉二則有喜三則無疑四則用  
亨五則貞吉惟上六極而猶升則為冥昧若能知其消  
息猶可為利故曰冥升利于不息之貞

困水在澤下澤方竭焉其道不加於物君子困窮之時也夫水者浸於外而後施於物今伏於其內何施之有是則川澤竭而伏其流君子困而隱其道困於險而不改其說

坎險也  
兌說也

其惟君子乎能固窮而樂道哉苟不安

其困欲尚口而去之窮斯甚矣知此時者卷而懷之極然後反其困必亨故曰困亨夫子之於陳蔡也豈其憂乎

井木為泉之底井道治而其施外彰君子居德遷惠之

時也夫井居其地而不可改其泉之出也無所不利君子居於德而不可移其惠之遷也無所不仁唯井也施之而不窮存之而不溢惟德也常施於人而不見其虧獨善於身而不見其餘故曰井德之地不其然乎

革火水相薄變在其中聖人行權革易之時也夫澤有水則得其宜今澤有火是反其常矣天下無道聖人革之以反常之權然而反常之權天下何由而從之以其內文明而外說也

內卦文明  
外卦兌說

以此之文明易彼之昏亂

以天下之說易四海之怨以至仁易不仁以有道易無道此所以反常而天下聽矣其湯武之作耶苟道德不去雖湯武日生當為天下之助何反常之有焉

鼎以木順火鼎始用焉聖人開基立器之時也夫天下無道聖人革之天下既革而制作興制作興而立成器立成器而鼎莫先焉故取鼎為義表時之新也湯武正位然後改正朔變服章更器用以新天下之務其此之時歟故曰革去故而鼎取新聖人之新為天下也夫何

盛焉莫盛乎享上帝而養聖賢也享上帝而天下順養  
聖賢而天下治不亦盛乎

震雷相從而興感動萬物內外皆震君子心身戒懼之  
時也萬物震其道通焉君子震其德崇焉君子之懼於  
心也思慮必慎其始則百志弗違於道懼於身也進退  
不履於違則百行弗罹于禍故初九震來而致福慎於  
始也六二震來而喪貝履於危也六二乘剛夫震者長子之  
道也長子有威驚遠而懼邇然後能主宗廟之器而祭

祀不輟也夫

艮山相當而各止其所內外不相與

六爻皆無應

上下靜止

之時也天地動而萬物生日月動而晝夜成聖賢動而天下亨今其止者君子理不可動之時也故此卦無元亨利貞之德者以其道不行焉然止之為道必因時而存之若夫時不可進斯止矣高不可亢斯止矣位不可侵斯止矣欲不可縱斯止矣止得其時何咎之有故曰時止則止時行則行動靜不失其時其道光明非君子其

孰能與於此乎

漸山上生木日益其高君子漸進之時也夫內止而不躁外巽而不爭以斯而進不亦漸乎長女得位乎其外故曰女歸吉然則女生而知其嫁也必漸而及時然後有歸焉君子學而知其仕也必漸而成德然後有位焉故升高必自下陟遐必自邇乾陽漸進而至於在天坤陰漸進而至于堅冰天地不能踰而況於人乎苟內不止而躁外不巽而爭則失漸之道犯時之忌豈正邦之



有焉

豐文明以動無往不亨王道開大之時也夫雷電之至  
隱者彰而否者亨聖賢之造困者通而幽者顯於是制  
乎禮以序天下之倫作乎樂以興天下之和物物昌而  
無不大也是以謂之豐然則日之動也

下離日也  
上震動也

豐于

正中焉文明之動也豐于皇極焉過乎正中日斯昃矣  
過乎皇極文明虧矣故曰宜日中進於大而戒于盈也  
不哉

旅火麗山而不久其處君子羈旅之時也君子羈旅之時處無其位何能與物大通然則內止而不動于心外明而弗迷其往以斯適旅故得小亨而貞吉夫旅人之志卑則自辱高則見嫉能執其中可謂智矣是故初瑣瑣而四不快者以其處二體之下卑以自辱者也三焚次而上焚巢者以其據二體之上高而見嫉者也二懷資而五譽命者柔而不失其中者也君子旅之時也道其然乎

巽風從至而物莫之違上下皆順命令宣行之時也夫  
上下弗順雖令不從今上下皆順故可申命而行事也  
若夫巽之為德其失也偽非君子體之則入乎柔邪之  
道矣觀其名雖近於謙焉然則謙之為體內剛而外柔  
謙卦坤外艮內  
坤柔而艮剛也降於禮而不降於德者也是以亨君子  
有終巽之為體內外皆柔可以行權未可以終義惟五  
以中正而志行乃得小亨利有攸往利見大人是故謙  
之六爻皆無凶咎巽之六爻則美惡半矣

兌澤重潤而上下皆說君子推恩敷惠之時也夫說萬物者莫說乎澤今復重之民說而無疆者也勸天下者莫大乎推恩而敷惠則順乎天應乎人而王道亨不然者反此若夫威以先民民重其勞威以犯難民重其死故周文為臺而人謂神靈者忘其勞也楚子下令而人如挾纊者忘其死也然則說之為德其失也佞上下皆說之時必内存其剛正然後免佞之情故曰說以利貞

論

# 帝王好尚論

老子曰我無為而民自化我好靜而民自正我無欲而民自富我無事而民自樸此則述古之風以警多事之時也三代以還異於太古王天下者身先教化使民從善故禮曰人君謹其所好惡君好之則民從之孔子曰上好禮則民莫敢不恭上好義則民莫敢不服上好信則民莫敢不用情由此言之聖帝明王豈得無好在其正而已堯設敢諫鼓建進善旌舜好問而成至化禹拜

昌言而立大功湯五聘伊尹文王躬迎呂望周公握髮  
吐哺以待白屋之士鄭武公好賢而詩雅歌之燕昭王  
築臺募士而智者歸之斯聖賢好尚如是之急也桀紂  
好利欲不好諫諍而天下亡秦好兵刑不好仁義而天  
下歸漢隋煬帝好逸豫不好恭儉而天下歸唐使桀紂  
好諫諍秦好仁義隋煬帝好恭儉豈有喪亂之禍哉

選任賢能論

王者得賢傑而天下治失賢傑而天下亂張良陳平之

徒秦失之亡漢得之興房杜魏褚之徒隋失之亡唐得之興故曰得士者昌失士者亡書曰先王昧爽不顯坐以待旦旁求俊彥啟迪後人其勤求人材如是之急也然則求之之道不可一端臯陶贊禹曰亦行有九德人

性行有九德以考真偽則可知

乃言曰載采采

載行采事也稱其人有德必言其所行某事某

事以

為驗禹曰何臯陶曰寬而栗

性寬洪而能莊栗

柔而立

和柔而能立事

愿而恭

慤愿而恭恪

亂而謹

亂治也有能謹

擾而毅

擾順也致果為毅

直

而溫

行正直而氣溫和

簡而廉

性簡大而有廉隅

剛而塞

剛斷而實塞

彊而

義無所屈撓彰厥有常吉哉彰明吉善也明九德之常動必合義以擇人而官之則政之善

孔子之門人目以四科一曰德行謂顏淵閔子騫也顏淵

聞知十二曰政事冉有季路也三曰言語宰我子貢也子貢

使於諸國而不辱君命也四曰文學子游子夏也經緯天地曰文禮樂典章之謂也游

夏能述之者也此所謂求人之道非一端也又書之說命篇曰

旁求俊乂列于庶位是朝廷庶位惟俊乂是求唐太宗

曰天下英雄落吾彀中語曰邦有道則智邦無道則愚

智則可與治國家安天下愚則可與避怨惡而全一身



故聖人以俊人為得不以柔訥為行如以柔訥為行而寵之則四海英雄無望於時矣使英雄失望於時則秦失張陳隋失房杜豈不悞天下之計哉

### 近名論

老子曰名與身孰親

言人知愛名不如愛其身之親也

莊子曰為善無近

名

言為善近名人將嫉之非全身之道也

此皆道家之訓使人薄於名而保

其真斯人之徒非爵祿可加賞罰可動宣為國家之用哉  
我先王以名為教使天下自勸湯解網文王葬枯骨天

下諸侯聞而歸之是三代人君已因名而重也太公直  
釣以邀文王夷齊餓死于西山仲尼聘七十國以求行

道是聖賢之流無不涉乎名也孔子作春秋即名教之

書也善者褒之不善者貶之使後世君臣愛令名而勸

畏惡名而慎矣夫子曰疾沒世而名不稱易曰善不積

不足以成名然則為善近名豈無偽耶臣請辯之孟子

曰堯舜性之也

性本仁義

三王身之也

躬行仁義

五霸假之也

假仁

義而求名後之諸侯逆天暴物殺人盜國不復愛其名者也

人臣亦然有性本忠孝者上也行忠孝者次也假忠孝而求名者又次也至若簡賢附勢反道敗德弑父叛君惟欲是從不復愛其名者下也人不愛名則雖有刑法干戈不可止其惡也武王克商式商容之間釋箕子之囚封比干之墓是聖人敦獎名教以激勸天下如取道家之言不使近名則豈復有忠臣烈士為國家之用哉

### 推委臣下論

天生兆人得王乃定萬機百度不可獨當內立公卿大

夫士外設公侯伯子男先擇材以處之次推公以委之  
然則委以人臣之職不委以人君之權臣請辯之夫執  
持典禮脩舉政教均和法令調理風俗內養萬民外撫  
四夷師表百僚經緯百事此宰輔之職也練兵戎謹城  
壁脩方畧威夷狄此將帥之職也肅朝廷之儀觸搢紳  
之邪此御史府之職也治繁劇制豪猾此京尹之職也  
至於金穀刑法各有攸司之職矣撫民人宣風化均徭  
役平賦歛此刺史縣令之職也是皆人臣之職不可不

委之也若乃區別邪正進退左右操榮辱之柄制英雄

之命此人主之權也不可盡委於下矣何以明之論語

孔子曰天下有道政不在大夫

注云制之由君也

晉委三卿

趙文

子韓宣子魏獻子

延陵季子曰晉國之政歸此三家矣後果分

晉為三國漢高祖招納羣英有將將之權而取天下至

于子孫不知祖宗之謀而獨委霍光又獨委王鳳至于

王莽皆有大禍西漢遂傾焉後漢光武親用二十八將

而取天下後之子孫不知祖宗之謀而獨委后族至于

宦官故姦雄競起以去惡為名東漢遂傾焉魏委司馬  
晉委劉裕其禍亦然唐太宗駕馭英雄取天下致太平  
至高宗朝李義府以立后之功獨見委用陷害忠良天  
下憤怨明皇初用姚崇宋璟為相而天下大治推心委  
之遂成故事及李林甫代其任仍復委之林甫奸邪能  
中傷善人朝廷無敢言得失者於是明皇不聞諫諍自  
謂宰相得人泰然無為矣言路已絕故至祿山犯關嚮  
闕而明皇不知一旦喪亂天下瓦解唐德遂衰初以推

委而天下治終以推委而天下亂何弊之然哉當推委之際擢十人上從其九是九分之恩出於下矣如此則數年之間左右前後皆權臣之黨也若黜辱十人上從其九是九分之威出於下矣如此則數年之間中外遠近無敢忤權臣者故下之情不達而上之勢孤矣此明皇之失為後代之鑒王者將收其權必先采人采人為難豈無其要孔子之辨門人標以四科一曰德行二曰政事三曰言語四曰文學以四科辨之思過半矣然則

朝廷清要之位覬覦者衆必審賢以與之賢傑之材讒  
嫉者衆必先時以辨之是故先王孜孜求賢以備選用  
且千官百辟豈能獨選必委之於輔弼矣惟清要之職  
雄劇之任不可輕授於人僉諧之外更加親選聖帝明  
王常精意於求賢不勞慮於臨事精意求賢則日聰明  
而自廣勞心臨事則日叢脞而自困宜乎屏煩細而廣  
詢訪其深於正道有憂天下之心可備輔相者記之其  
精於經術通聖人之旨可備顧問者記之其敢言正色



有端士之操可備諫諍者記之其能言方畧有烈士之風可備將帥者記之如斯之人精而求之熟而觀之然後寘清要之職授雄劇之任使人人竭力爭為腹心於是乎得以操榮辱之柄制英雄之命庶務委于下而柄歸于上始可以言無為矣猶復置御史大夫中丞使搢紳無敢慢者置諍臣七人使言路無敢蔽者置門下封駁司使制勅無得悞者此又推委無為之中而不廢其防不失其權者矣若留意逸豫孜孜於求賢親選之

時無賢可用則進退賞罰復歸於下雖有爵祿不足為上之恩雖有誅罰不足為上之威矣

議

上攻守二策狀

臣某言竊觀西事以來每議攻守未見適中或曰必行進討以期平定臣謂諸路進討則兵分將寡氣不完盛絕漠風沙迷失南北饋運輜重動有鈔掠賊之巢穴夏阻河外非有奇將不能遠襲至若寇常併兵來擾一路

每有朝旨令入界牽制其如將帥方畧非有素定茫然  
輕進不知所圖但求虛弱之處以剽竊為功既不能大  
振兵威故不能少分賊勢此進討牽制之無効也或曰  
宜用守策來則禦之去則勿逐臣觀今之守邊多非土  
兵不樂久戍又無營田必煩遠饋久戍則軍情危殆遠  
饋則民力將竭歲月繇久恐生他患此守禦之未利也  
臣荷國重寄曾無寸勞夙夜營營冀有所補而才識迂  
昧終無發明今采於邊人而成末議固不敢望其必行

在朝廷以衆論參之擇其可否如無所取乞賜寢罷今具下項攻守之議依聖旨指揮交付梁適齋迴赴闕者

議攻

臣謂進討未利則又何攻臣竊見延安之西慶州之東有賊界百餘里侵入漢地中有金湯白豹後橋三寨阻延慶二州徑過道路使兵勢不接策應迂遠自來雖曾攻取無招降之意據守之謀漢兵纔迴邊患如舊臣謂西賊更有大舉朝廷必令牽制則可攻之地其在於此

可用步兵三萬騎兵五千

廊延路步兵一萬二千騎兵三千涇原路步兵九千騎兵

一千環慶自選馬步一萬八千人

軍外番兵更可得七八千人軍行入界當先布號令

生降者賞殺降者斬得精強者賞害老幼婦女者斬拒者併兵以戮之服者厚利以安之遁者勿追疑有質也

居者勿遷俾安土也乃大為城寨以據其地

如舊城已險因而增

脩非守地則別擇要害之處以錢召帶甲之兵熟戶強壯兼其土役昨奉朝旨令修緣邊城寨臣以民方穡事將係官閒雜錢并勸令近上人以顧夫錢散與助功兵士充食錢其帶甲兵士翕然情願諸寨並已畢功

俟城寨堅完當留土兵以守之方諸舊寨必倍其數使

范全趙明以按撫之

范全今為騏驎副使慶州北部巡檢趙明今為東頭供奉官柔遠寨

蕃部巡檢

必嚴其戒曰賊大至則明斥候召援兵

金湯東去德靖寨四

十里西去東谷寨八十里西南去柔遠八十里白豹西去柔遠五十里南至慶州一百五十里

堅壁清

野以困之小至則扼險設伏以待之居常高估入中及

置營田以助之如此則可分彼賊勢振此兵威通得延

慶兩路軍馬易於應援所用主兵官員使勇決身先者

居其前

王信狄青劉拯劉貽孫張建侯范全

可用策應者居其次

任守信王達王

遇張宗武譚嘉

使臣中可當一隊者參於前後

張信王遇張忠

震王文思王文

郭達張懷實

有心力幹事者營立城寨

周美張璨劉兼濟

臣

李緯張繼勳楊麟

觀後漢段紀明以騎五千步萬人車三千兩錢五十四  
億三冬二夏大破諸羌又觀唐馬燧造戰車行則載甲  
兵止則為營陣或塞險以遏奔衝臣以此路山坡大車  
難進當用小車二千兩銀絹錢二十萬以賞有功將吏  
及歸降番部并就糴芻粟亦稍足用其環州之西鎮戎  
之東復有胡蘆泉一帶番部與明珠滅臧相接阻環州  
鎮戎徑過道路明珠滅臧之居北接賊疆多懷觀望又

延州南安去故綏州四十里在銀夏川口今延州兵馬東渡黃河北入嵐石却西渡黃河倒來麟州策應蓋以故綏州一帶賊界阻斷徑過道路已上三處內麟府一路臣不曾到彼之下本處訪問及畫圖即可見山川道路次第如取下一處城寨平定則更圖一處為據守之策比之朝去暮還此為稍便臣謹議

議守

臣觀西戎居絕漠之外長河之北倚遠而險未易可取建官置兵不用祿食每舉衆犯邊一毫之物皆出其下



風集雲散未嘗聚養中國則不然遠戍之兵久而不代  
負星霜之苦懷鄉國之望又日給廩食月給庫緡春冬  
之衣鞋銀饋輸滿道千里不絕國用民力日以屈乏軍  
情愁怨須務姑息此中原積兵之憂異於夷狄也臣謂  
戎狄縱降塞垣須守當務經遠古豈無謀臣觀漢趙充  
國興屯田大獲地利遂破先零魏武於征伐之中分帶  
甲之士隨宜墾闢故下不甚勞大功克舉數年之中所  
在積粟倉廩皆滿唐置屯田天寶八年河西收二十六

萬石隴西收四十四萬石孫武曰分建諸侯以其利而利之使食其土之毛實役其人氓之力故賦稅無轉徙之勞徭役無怨曠之歎臣昨在延州見知青澗城种世衡言欲於本處漸興田利今聞僅獲萬石臣觀今之邊寨皆可使弓手土兵以守之因置營田據畝定課兵獲餘羨中糴於官人樂其勤公收其利則轉輸之患久可息矣且使其兵徙家塞下重田利習地勢顧父母妻子而堅其守比之東兵不樂田利不習地勢復無懷戀者

功相遠矣

少田處許蕃部進納荒田  
以遷資酬獎或量給價直

儻朝廷許行此道

則委臣舉擇官員約古之義酌今之宜行於邊陲庶幾  
守愈久而備愈充雖戎狄時為邊患不能困我中國此  
臣所以言假土兵弓手之力以置屯田為守之利也然  
臣觀前漢高帝之盛臣有蕭張決勝千里下有百戰之  
師以四十萬之衆困於平城乃約匈奴和親至高后文  
景代代如之不絕其好匈奴屢變往往犯塞殺戮吏民  
不勝其酷至於書問傲慢下視中國而人主以生民之

故屈已含容不為之動孝文即位將軍陳武請議征討  
以一封疆孝文曰兵凶器也難克所願動亦耗病謂百  
姓遠方何今匈奴內侵軍吏無功邊民父子荷兵日久  
朕動心痛傷何日忘之未能消距願且堅邊設候結和  
通使休寧北陲為功多矣且無議兵故百姓無内外之  
徭得息肩於田畝天下富實雞鳴犬吠烟火萬里可謂  
和樂者乎司馬遷以文帝能和樂天下協于大樂故著  
于律書為後代法臣謂國家用攻則宜取其近而兵勢

不危用守則必圖其久而民力不匱然後取文帝和樂之德無孝武哀痛之悔則天下幸甚天下幸甚臣謹議  
答竊議

漢高祖以黃金四萬付陳平而不問其出入時陳平未  
有功也唐高祖將斬李靖而恕之時李靖未有功也是  
前代帝王先布之以恩後責之以効也我太祖嘗謂近  
臣曰安邊御衆須是得人心優恤其家厚其爵祿多與  
公用錢及屬州課利使之迴圖特免稅算聽其名募驍

勇以為爪牙苟財用豐盈必能集事朕雖減後宮之數  
極於儉約以備邊費亦無辭也命將帥李漢超等十三  
人分守西北諸州家族在京者撫之甚厚凡軍中事悉  
許便宜每來入朝必召對命坐賜與優厚撫而遣之由  
是邊臣悉富於財得以養士用間洞見蕃夷情狀每戎  
狄入寇必能先知預為之備設伏掩擊多致克捷二十  
年間無西北之憂故兵力雄盛武功蓋世由此而致也  
今滕宗諒為一路經畧安撫使兼兵馬都部署以公用

錢廻圖管設使命將校并蕃部酋豪或贈遺官員游士而梁堅彈奏滕使過錢十六萬貫有數萬不明及置獄研窮纔用三千餘貫復有所歸無分毫入已是未見貪吏之狀也宣撫田舍人朝之端人也至慶州目擊軍民蕃部等借留滕侯遮壅於道足下何得謂之豺狼主上仁聖不深罪宗諒張亢二人仍降詔誕告邊臣依祖宗故事使廻圖公用一如平日中憲不知內朝有此詔命聞羣口橫議遂伏閣請加責二人以正憲律既下法寺

則宗諒合贖銅而不當去官是前斷已坐亢罪將公用錢并酒散與軍人當更追一官又朝廷既已降詔貸之亦難反汗足下責我保庇此人固不敢避自古文法常害邊功今天子仁聖有西北之憂孜孜求人以待大患帥臣用度小過不害邊事居輔弼者固當竭力辨明恐誤朝廷機事為天下之憂豈暇私於二人哉昔匈奴辱漢使者蓋不一也唐賢使于賊庭不辱命者如韓愈李回皆成大名近邵良佐使于元昊迴日改官賜服色報



其勞也良佐懼不可再去滿朝搢紳無一士請行朝廷  
召張子奭乘驛而至又選王正倫副之皆敢行不懼既  
不懼矣觀其辨論學術可為之使乃遣將命暨還得元  
昊書疏頗順於前願去號稱臣又能減數節事體且沙  
漠窮絕入不測之地既能忘生又不辱命朝廷擢進兩  
資不可待以常調也元昊素貪利未厭心兵擾絕塞此  
戎人之常態非子奭之過也今之士大夫高談時政皆  
謂不能拔人限以資級使才者多滯而朝廷之賢及見

殊命越一等則踴然聚議以為過優何薄之甚耶

讚

楊文公寫真讚

楊公以武夷之靈降于我宋在太宗朝以神童被召三命至著作佐郎直集賢院在真宗朝薦當清近終翰林學士工部侍郎公以斯文為己任由是東封西祀之儀脩史脩書之局皆歸大手為皇家之盛典當時臺閣英游蓋多出於師門矣而命世之才其位不充故天下知

公之文而未知其道也昔王文正公居宰輔僅二十年未嘗見愛惡之心天下謂之大雅寇萊公當國真宗有澶淵之幸而能左右天子如山不動却戎狄保宗社天下謂之大忠樞密扶風馬公慷慨立朝有犯無隱天下謂之至直此三君子者一代之偉人也公與三君子深相交許情如金石則公之道其正可知矣然端言方行回邪忌之故嘗避權臣之禍歸陽翟山再起會真宗不豫中外為憂萊公將奮大計正前星於北辰引太陽於

少海公預宏議就高文間弗克行既終而今上知之乃  
下詔追悼贈禮部尚書謚曰文今覩公之真而為讚云  
嗚呼楊公兩朝清風盛乎斯文直哉厥躬端者我遊邪  
者我仇霖雨不作日月其流仰止遺真雍雍哲人吾不  
知乎為之仙為之神

范文正集卷五

欽定四庫全書薈要卷一萬四千二百三十一

集部

范文正集卷六

宋 范仲淹 撰

頌

皇儲資聖頌

并序

臣聞聖人之作易也以言乎離則大人有繼明之體以  
言乎震則元子有主器之威何則體以繼明而萬邦久  
照威以主器而七廟大寧其況登監撫之期資聖神之

政者哉國家興皇統紹僊源寶葉茂昌靈根善固皇祖  
之功也神武不殺天開八際皇宗之德也文明以健景  
臨萬有聖上妙體乾元光御人極應上真之道撫大寶  
之運華親肅睦美俗昭明尚周文之文而百官懋德下  
漢武之武而四夷懷恩於是覓神洛以朝先因心之至  
也啟帝符以升中動天之著也如報厚德於汾壤歟大  
道於亳宮表開聖之都揭降清之館鴻名盛則皇哉休  
哉曠代不舉者吾皇富有焉然猶清淨戒豫恭默思高

觀妙自然播芳無外璿樞麗正物有戴天之安金鑑凝  
明人咸抱日之景若夫道德之奧仁義之醇禮樂之和  
刑政之清無得名矣又盡善矣功成功矣事無事矣聖  
子神孫其法象之矣居一日羨三公登東塗皇帝若曰  
眷惟元子萬邦重器道心之微必究王業之難必知性  
習惟其初左右惟其賢爾周爾召往師傅焉講善體政  
欲有觀焉三公相與而進曰惟皇之嗣惟天之授生而  
神靈幼而岐嶷而復累藩邸踐儲副奉見清廟載禧圓

丘固當輔聖克家佐天理物也矣皇太子乃夕惕欽命  
未明而興儼觀東朝齊立西面與夫股肱優老羽翼令  
人講帝皇之風參天人之理遐燭安危之轍眇窮得失  
之源曷嘗不力仁而民懷作德而祥降於是消息乎九  
範經營乎五典與治與亂警策而弗迷惟時惟幾佩服  
而深論此道心之微也蓋究詳於妙慮其於中外之務  
光大之政則賢必尚爵功必厚祿謀一令思以敷天下  
之祐議一賞思以起天下之善舉一刑則必愴然有不



忍之心暴何端而興矣接一士則必慄然有好直之心  
佞何階而進矣天下欲以富利而弗奪也欲以壽養而  
弗傷也欲以固信而弗欺也欲以安靜而弗擾也期于  
無盜責之于衣食期于無刑求之于禮義禮義既充熟  
而成風然後天下熙熙而遂樂也無窮然則上世聖賢  
未嘗不勉而後至慎而後寧故書曰勗哉庶其至矣詩  
云戒之慎之保其寧矣此王業之難也豈徒知之固以  
輔而去之矣若性習左右可得而言聰哲自天誠明見

志其始也后稷玩于播殖仲尼戲于俎豆爰發五勝之  
辨實宣三正之方今乃琴誦成文典書在御入則有保  
出則有師太傅居前少傅居後而能幹蠱天家代工王  
室美四方之事資萬機之聖識者曰正斯嗣也明斯德  
也由斯道也天意人事章章乎豈符讖而後著也惟聖  
源深長天道輔相歟非天私我有宋惟天祐于一德昔  
陶唐氏之與舜也歷試諸艱三十載而堯德益明天下  
益治今斯時也然奚若吾君之嗣之美矣君子有言曰

巍巍乎皇之有成功也哉郁郁乎嗣之有成德也哉樂  
聖者係之頌云

粵自黃靈爰及炎宋魏魏天造縣縣帝統神武之祖文  
明之宗元基不拔盛業來重我后御極吾民敏德盛節  
交舉庶彙咸殖萬邦作孚百神受職允也時雍何哉帝  
力王假有家乃建承華三善靡忒二對何嘉日光月輪  
山輝海潤相見乎離蓋取諸震帝均其勤撫國監軍天  
授英悟日章溫文乃左乃右惟仁惟舊稼穡斯憂艱難

思究授人惟材進人惟德刑也以薄思也以直屈者其  
伸勞者其逸言思逆耳道務前膝玉振金相英聲茂實  
縣若壽域熙如春臺守之而已仁遠乎哉天業昌兮天  
家光兮聖有嗣兮明無疆兮皇心之寧兮黔首之康兮  
祖宗之靈兮子孫之長兮金石在廟兮頌聲洋洋兮

泰州張侯祠堂頌

并序

生祠民報德也制置公本汝潁之奇以文武事朝廷為  
勲臣於四方而嘗戰守秦塞制勝非一招降屬寇全活

甚衆撫南夷以久遠俗使北疆以尋大信光華之命所  
嚮凝績天禧中國家以鹽鐵饋運之計重於東南命公  
領之於茲八年公夙夜不懈闕政咸舉初淮浙之間鹽  
民告困海利云剝公請振崇泰楚三郡亭人歲增課數  
十萬石

三郡鹽課虧者十年公訪其利害請加  
買直蠲積負行數事以蘇之課乃大增興杭秀

海三郡鹽場歲入課四十萬石又嘗蘇秀間太湖漲溢  
害於甫田公請導入于海復租六十萬石白沙郡大江  
之北有灣數里風濤為險舟楫不利公於是開長蘆西

河以濟之又高郵之北漕河屢決阻我糧道破我農畝  
公於是作隄二百里旁置石限平其增損以均灌漕焉  
惟茲海陵古有潮堰舊功弗葺驚波荐至鹽其稼穡偃  
其桑梓此邦之人極乎其否公堅請修復乃興厥功橫  
議囂然僅使中廢公又與轉運使胡公再列其狀朝廷  
可之仍許兼領是郡以觀厥成起基於天聖二載之秋  
畢工於六載之春既而捍其大災蠲其積負朞月之內  
民有復諸業射諸田者共一千六百戶將歸其租者又

三千餘戶

海陵民因潮之患而倚閭其租者三千餘戶天聖四年勅依制置司奏候堰成日定奪今

漸復撫之育之以簡以愛優優其政洽于民心於是請焉

肖公之像以奉于祠期子孫之不忘乎秉筆者故作頌焉

我公雄傑經制楚越鑒洞毛髮誠揭日月建利除孽代天工發海陵嗷嗷古防弗牢萬頃良膏歲凶於濤民焉呼號不粒而逃公聞憫怛乃按乃察草奏屢達狂議四遏心過金鐵對天不奪宸聽既聰宰謀既同展矣胡公

協力諧忠兵民交克興防之功盤盤偃偃百里而遠雲  
矗不散山亘不斷如天作限奠萬家產朝以公賢兼于  
蕃宣傷者我全疾者我痊逋亡幾千咸復于田公義不  
爽欲報彌廣建牙列壤將有攸往衆圖其象以永瞻仰  
列星之精列嶽之靈儀焉亭亭神焉熒熒居千百齡此  
邦鎮寧既寧既聚濤莫我苦比比牖戶鱗鱗場圃而翁  
而豎于歌于舞天子穆清諸侯經營民兮樂成穀兮登  
盈作為頌聲告于神明



述

南京府學生朱從道名述

天聖紀號之六載樞密留守侍郎齊郡公以東朝舊德  
右弼上賢將啟秉鈞之猷尚圖分政之任善下成乎江  
海養浩充乎天地誠明之際無隱不及居一日曰祖宗  
之都儀刑萬邦道德之所興禮樂之所出風化不作四  
方何仰哉乃首訪膠庠躬省絃誦敦六籍以恢本發四  
科以彰善於是人樂名教復鄒魯之盛士為聲詩登周

召之美既而丘園初秀閎閱令嗣拳拳允集濟濟如歸  
沛國朱生世嚴冠冕幼苦霜露憫先構之將墜忽中陵  
之見育公特命就學果知向方豹以革而有文鴻亦漸  
而無咎公又嘉其遷善以從道而名焉仍命字之云在  
復之六四曰中行獨復以從道也言能體中而行特從  
於道以斯而復君子之象請字曰復之庶左右於名矣  
然則道者何率性之謂也從者何由道之謂也臣則由  
乎忠子則由乎孝行已由乎禮制事由乎義保民由乎

信待物由乎仁此道之端也子將從之乎然後可以言  
國可以言家可以言民可以言物豈不大哉若乃誠而  
明之中而和之揖讓乎聖賢蟠極乎天地此道之致也  
必大成於心而後可言焉朱生其拜公之命勉之哉抑  
文與學者道之器也以君子乘之則積而不敗不以君  
子乘之則滿而致覆朱生其拜公之命慎之哉嘻子未  
預於教也弗學而志窮如玉之未攻如泉之在蒙昧焉  
而弗見其實汨焉而莫朝於宗子既預於教也克學而

神悟如金之在鑄如驥之方御躍焉可成乎美器騰焉

可致乎夷路者也某觀士人中有青衿詩書素髮猷畝  
名不登搢紳之議目弗接軒冕之姿彼何不遇之甚哉  
朱生進德有漸屬文未幾始登庠序之列乃被巖廊之  
知此何遇之甚哉緊爾門之濟美歟抑我公之善教歟  
論者曰公之旨也豈徒正爾之名蓋將成爾之德激清  
學校騰休都邑俾夫多士聳善庶邦成流格美俗于詩  
書被頌聲於金石致我宋之文炳焉復三代之英抑公

之盛德乎朱生振迹於盛德之下發名於善教之始何必申繻之劇論豈異夫子之榮褒者哉當夙夜懷之不墜我公之令訓也其庶幾乎

序

太清宮九詠序

譙有老子廟唐為太清宮地靈物奇觀者駭異歷代嚴護景概所存若靈溪渦河九龍井左紐再生昇天檜皆附于圖籍發乎咏歌而風人之才難其破的余友曼卿

將命斯來實董宮事嗜道之外樂乎聲詩覽靈仙之區  
異其八物益以宮題而成九詠觀其立意皆鑿幽索秘  
破堅發竒高凌虹蜺清出金石有以見詩力之雄哉文  
以氣為主此其辨乎矧夫人託文而志深物乘文而名  
遠如揚子雲之縣竹王文孝之靈光孫興公之天台皆  
揮藻一時騰照千載者矣噦彼物也庇聖賢之居而能  
長久後果動君子之風雅以發乎名矧人也庇聖賢之  
道則能高明果亦動天下之頌聲以揚其烈覽之者得

無起歟高平范仲淹序

朝賢送定惠大師詩序

某典姑蘇郡一日有吳僧定惠大師宗秀者發龍山渡  
松江駐錫于門出致政侍郎安定公本道計使太原公  
二書偕曰師往無他有朝中送行詩請為序引以示方  
來爾某既不得謝乃叩其端師自言生不血茹七歲持  
佛事隱于靈巖多歷年所晚歲游名公之門然亦未嘗  
及利天聖中大丞相東平公清河公憐其舊奏賜紫方

袍號定惠乃告歸故山又以詩寵之既而薦紳先生咸有贈章將勒堅珉期於不墜某感其說志其事且知上人之隱盛於吾儒之隱遠矣士有氣吞芝蘭才奔風雲精貫乎天人神馳於古今燭治亂興亡之機席法度教化之倫道通巖廊跡墜林壑遺沒于麋鹿之羣者衆矣如近代之陸龜蒙陳陶今朝雍丘邢敦錢唐林逋或執節堅介或放詞雅遠皆四方之間人奈何道未信于三公名不熟於天子及其收遺文旌隱志而始惜其難得



斯天下義士為之長太息矣豈如金僊之流而人懷慕  
謝絕堂構長揖軒冕來則談空實相號天人師去則指  
霞嶺嘯風林天子有賜三公有贈斯以見上人之隱盛  
於吾人之隱遠矣必也均是光輝以及考槃之際則聖  
朝無負於隱君子也矧將有取焉子夏曰主文而誦諫  
蓋風人之職也序詩者敢有二事時景祐二年五月八  
日尚書員外郎充天章閣待制范某序

太子賓客謝公夢讀史詩序

公清淨而文出入朝廷三十年語默仁義進止於青雲  
之衢徐徐如也自尚書郎領侍御史知雜事日轉戰于  
寵辱之場者或勝而夸或殆而悲乃歎曰吾病矣不敢  
進寸而退尺求為會稽郡及還又請知西臺因分務于  
洛下朝廷高其意累遷至東宮三品悉屏去外慮於筆  
硯歌詩素所耽嗜亦不復為曰方逸我以老也數年間  
惟日看舊史一編以代賓話爾無何先徹樂之前一日  
因寢覺記夢中所得詩一章召其孫景初錄焉他日士

大夫求觀之仰其風旨識者謂人之將終神鮮不睽公  
於是時乃有正夢特歌周孔之仁義能久澤於吾民以  
公生平之心蹈於斯誠於斯故精義存存著於神明而  
不亂矣今而後知傳說騎箕尾而為星者至精之適亦  
何怪哉其詩曰

百年奇特幾張紙千古英雄一窖塵惟有炳然周孔教  
至今仁義浸生民

刻唐祖先生墓誌於賀監祠堂序

某自丹陽移領會稽首途之日過邵餽逸人溪齋因話  
照湖事逸人曰客有自江夏寄唐人許鼎所撰祖先生  
墓誌頗言賀監之異出而示余辭精理遠徐常侍鉉為  
之別序既抵郡訪天長觀即賀公之舊居也歎其真堂  
卑陋以甚乃命工度材而新之又刻徐公所序之文以  
廣遊人之觀采焉時寶元元年知越州范某序

述夢詩序

景祐戊寅歲某自鄱陽移領丹徒郡暇日遊甘露寺謁

唐相李衛公真堂其制隘陋乃遷於南樓刻公本傳于其側又得集賢錢綺翁書云我從父漢東公嘗求衛公之文于四方得集外詩賦雜著共成一編目云一品拾遺

衛公有一品集姑臧集西南備邊錄  
獻替錄御臣要畧伐叛志窮愁志

其間有浙西述

夢詩四十韻時元微之在浙東劉夢得在厯陽竝屬和焉愛其雄富藏之褚中二十年矣願刻石以期不泯某觀三君子之詩嗟其才大名高俱見咎於當世李遇武宗獨立不懼經制四方有相之功雖姦黨營陷而義不

朽矣元初以才進拜拾遺歷御史府無所畏避為執政

所困者久之及天子召用書詔雅遠甚有補益之風至

於與晉公相失而姦人乘之謂元欲刺裴劍則無狀然

一戾正人其光墜地惜哉劉與柳宗元呂溫數人坐王

叔丈黨貶廢不用覽數君子之述而禮意精密涉道非

淺如叔文狂甚義必不交叔文以藝進東宮人望素輕

然傳稱知書好論理道為太子所信順宗即位遂見用

引禹錫等決事禁中及議罷中人兵權悟俱文珍輩又

絕韋臯私請欲斬劉闢其意非忠乎臯銜之會順宗病  
篤臯揣太子意請監國而誅叔文憲宗納臯之謀而行  
內禪故當朝左右謂之黨人者豈復見雪唐書蕪駁因  
其成敗而書之無所裁正孟子曰盡信書不如無書吾  
聞夫子褒貶不以一疵而廢人之業也因刻三君子之  
詩而傷焉至于柳呂文章皆非常之士亦不幸之甚也  
韓退之欲作唐之一經誅姦諛於既死發潛德之幽光  
豈有意於諸君子乎故書之

尹師魯河南集序

予觀堯典舜歌而下文章之作醇醜迭變代無窮乎惟  
抑末揚本去鄭復雅左右聖人之道者難之近則唐正  
元元和之間韓退之主盟于文而古道最盛懿僖以降  
寢及五代其體薄弱皇朝柳仲塗起而麾之髦俊率從  
焉仲塗門人能師經探道有文於天下者多矣洎楊大  
年以應用之才獨步當世學者刻辭鏤意有希髣髴未  
暇及古也其間甚者專事藻飾破碎大雅反謂古道不



適於用廢而弗學者久之洛陽尹師魯少有高識不逐  
時輩從穆伯長游力為古文而師魯深於春秋故其文  
謹嚴辭約而理精章奏疏議大見風采士林方聳慕焉  
遽得歐陽永叔從而大振之由是天下之文一變而其  
深有功於道歟師魯天聖二年登進士第後中拔萃科  
從事於西都時洛守王文正沂公暨王文康公並加禮  
遇遂薦引於朝寘之文館尋以論事切直貶監郢州市  
征後起為陝西經畧判官屢更邊任遷起居舍人直龍

圖閣知潞州以前守平涼日貸公食錢於將佐議者不

以情復貶漢東節度副使歲餘監均州市征予方守南

陽郡一旦師魯昇疾而來相見累日無一言及後事家

人問之不荅予即告之曰師魯之行將與韓公稚圭歐

陽永叔述之以貽後代君家雖貧共當捐俸以資之君

其端心靖神無或後憂師魯舉手曰公言盡矣我不復

云翌日往視之不獲見傳言曰已別矣遂隱几而卒故

人諸生聚而泣之且歎其精明如是剛決如是死生不

能亂其心可不謂正乎死而不失其正君子何少哉師  
魯之才之行與其履歷則有永叔為之墓銘稚圭為之  
墓表此不備載噫師魯有心於時而多難不壽所為文  
章亦未嘗編次惟先傳於人者索而類之成十卷亦足  
見其志也故序之

### 唐異詩序

皇宋處士唐異字子正人之秀也之才之藝揭乎清名  
西京故留臺李公建中時謂善画為士大夫之所尚而

子正之筆實左右焉江東林君復神於墨妙一見而歎  
曰唐公之筆老而彌壯東宮故諭德崔公遵度時謂善  
琴為士大夫之所重而子正之音嘗唱和焉高平范仲  
淹師其絃歌嘗貽之書曰崔公既沒琴不在茲乎處士  
二妙之外嗜於風雅探幽索竒不知其老之將至一日  
以集相示俾為序焉嘻詩之為意也範圍乎一氣出入  
乎萬物卷舒變化其體甚大故夫喜焉如春悲焉如秋  
徘徊如雲崢嶸如山高乎如日星遠乎如神仙森如武

庫鏘如樂府羽翰乎教化之聲獻酬乎仁義之醇上以德於君下以風於民不然何以動天地而感鬼神哉而詩家者流厥情非一矢志之人其辭苦得意之人其辭逸樂天之人其辭達觀閔之人其辭怒如孟東野之清苦薛許昌之英逸白樂天之明達羅江東之憤怒此皆與時消息不失其正者也五代以還斯文大剝悲哀為主風流不歸皇朝龍興頌聲來復大雅君子當抗心於三代然九州之廣庠序未振四始之奧講議蓋寡其或

不知而作影響前輩因人之尚忘己之實吟咏性情而  
不顧其分風賦比興而不觀其時故有非窮途而悲非  
亂世而怨華車有寒苦之述白社為驕奢之語學步不  
至效顰則多以至靡靡增華悖悖相濫仰不主乎規諫  
俯不主乎勸誡抱鄭衛之奏青夔曠之賞游西北之流  
望江海之宗者有矣觀乎處士之作也孑然弗倫洗然  
無塵意必以淳語必以真樂則歌之憂則懷之無虛美  
無苟怨隱居求志多優游之詠天下有道無憤惋之作

騷雅之際此無愧焉覽之者有以知詩道之艱國風之  
正也時天聖四年五月日序

說

四德說

易有說卦所以明其象而示其教也卦有四德曰元亨利貞雖文言具載其端後之學者或未暢其義故愚遠  
取諸天近取諸物復廣其說焉夫元者何也道之純者  
也於乾為資始於坤為發生於人為溫良為樂善為好

生於國為行慶為刑措於家為父慈為子孝為嘉穀為  
四靈其迹異其道同統而言之則善之長也夫亨者何  
也道之通者也於天為三辰昭會於地為萬物繁殖於  
人為得時茂勲於國為聖賢相遇為朝覲會同為制禮  
作樂為上下交泰於家為父子為夫婦為九族和睦於  
物為雲龍為風虎為魚水其迹異其道同統而言之則  
嘉之會也夫利者何也道之用者也於天為膏雨於地  
為百川於人為兼濟於國為惠民為日中市於家為豐



財為富其鄰於物為騶虞為得食雞其迹異其道同統而言之則義之和也夫貞者何也道之守者也於天為行健於地為厚載於人為正直為忠毅於國為典則為權衡於家為男女正位為長子主器於物為金玉為辨彛其迹異其道同統而言之則事之幹也行此四者之謂道述此四者之謂教四者之用天所不能違而況於人乎況於萬物乎故君子不去也天微四德天道不行地微四德坤儀不寧人微四德則無令名國家無四德則

風教不倫物無四德則祥瑞不生惟乾坤之德統其四者焉餘卦則鮮克備矣惟聖人體乾而行後之希聖者亦鮮克備矣堯舜率天下以仁乾元之君也湯武應天順人開國除亂履其亨而闡其利者也夏禹治水乾之成功幹其事者也體其元而兼其三者堯舜也歟後之人孰能生知宜乎跂踵而勤行矣處必親仁元之基也動能俟時亨之始也進思濟物利之方也守誠不回貞之道也四者未能兼行則出乎彼而入乎此出乎此而

入乎彼周旋進退不離四者之中如是則其殆庶幾乎  
說春秋序

聖人之為春秋也因東魯之文追西周之制褒貶大舉  
賞罰盡在謹聖帝明皇之法峻亂臣賊子之防其間華  
衮貽榮蕭斧示辱一字之下百王不刊游夏既無補於  
前公穀蓋有失於後雖丘明之傳頗多冰釋而素王之  
言尚或天遠不講不議其無津涯今褒博者流咸志於  
道以天命之正性脩王佐之異材不深春秋吾未信也

三傳房君有元凱之癖兼仲舒之學丈席之際精義入  
神吾輩方扣聖門宜循師道粹屬詞比事之教洞尊王  
黜霸之經由此登太山而知高入宗廟而見美升堂覩  
奧必有人焉君子哉無廢

范文正集卷六


謹案卷五第十一頁後二行漸山上生木刊本上訛止據易漸卦象詞山上有木句改

卷六第六頁前三行於是請蕭公之像以奉于祠刊本像作儀據時兆文本改

第七頁前六行禮樂之所出刊本樂訛義據時兆文本改

第十九頁前五行則事之幹也刊本事訛道據易乾卦文言貞者事之幹也句改





總校官庶吉士臣侍 朝

校對官編修臣沈清藻

謄錄貢生臣張誠智

欽定四庫全書薈要

集部

范文正集卷八

七

詳校官助教臣常循





欽定四庫全書薈要卷一萬四千二百三十二

集部

范文正集卷七

宋 范仲淹 撰



記

桐廬郡嚴先生祠堂記

先生漢光武之故人也相尚以道及帝握赤符乘六龍  
得聖人之時臣妾億兆天下孰加焉惟先生以節高之  
既而動星象歸江湖得聖人之清泥塗軒冕天下孰加

焉惟光武以禮下之在蠱之上九衆方有為而獨不事  
王侯高尚其事先生以之在屯之初九陽德方亨而能  
以貴下賤大得民也光武以之蓋先生之心出乎日月  
之上光武之器包乎天地之外微先生不能成光武之  
大微光武豈能遂先生之高哉而使貪夫廉懦夫立是  
有大功於名教也某來守是邦始構堂而奠焉廼復其  
為後者四家以奉祠事又從而歌曰雲山蒼蒼江水泱  
泱先生之風山高水長

南京書院題名記

皇宋闢天下建太平功揭日月澤注河漢金革塵積絃  
誦風布乃有睢陽先生贈禮部侍郎戚公同文以貢于  
丘園教育為樂門弟子由文行而進者自故兵部侍郎  
許公驤而下凡若干人先生之嗣故都官郎中維樞密  
直學士綸並純文浩學世濟其美清德素行貴而能貧  
祥符中鄉人曹氏請以金三百萬建學于先生之廬學  
士之子殿中丞舜賓時在私庭俾幹其裕故太原奉常

博士瀆時舉賢良始掌其教故清河職方員外郎吉甫  
時以管記以領其綱學士畫一而上真宗皇帝為之嘉  
歎面可其奏今端明殿學士盛公侍郎度文其記前叅  
預政事陳公侍郎堯佐題其榜由是風乎四方士也如  
狂望兮梁園歸歟魯堂章甫如星縫掖如雲講議乎經  
詠思乎文經以明道若太陽之御六合焉文以通理若  
四時之妙萬物焉誠以日至義以日精聚學為海則九  
河我吞百谷我尊淬詞為鋒則浮雲我決良玉我切然

則文學之器天成不一或醇醇而古或郁郁於時或峻  
于層雲或深于重淵至於通易之神明得詩之風化洞  
春秋褒貶之法達禮樂制作之情善言二帝三王之書  
博涉九流百家之說者蓋互有人焉若夫廊廟其器有  
憂天下之心進可為卿大夫者天人其學能樂古人之  
道退可為鄉先生者亦不無矣觀夫二十年間相繼登  
科而魁甲英雄儀羽臺閣蓋翩翩焉未見其止宜觀名  
列以勸方來登斯綴者不負國家之樂育不孤師門之

禮教不忘朋簪之善導孜孜仁義惟日不足庶幾乎刊金石而無愧也抑又使天下庠序規此而興濟濟羣髦咸底于道則皇家三五之風步武可到戚門之光亦無窮已他日門人中絕德至行高尚不仕如睢陽先生者當又附此焉

清白堂記

會稽府署據卧龍山之南足北上有蓬萊閣閣之西有涼堂堂之西有巖焉巖之下有地方數丈密蔓深叢莽

然就荒一日命役徒而闢之中獲廢井即呼工出其泥  
滓觀其好惡曰嘉泉擇高年吏問廢之由不知也乃扃  
而澄之三日而後汲視其泉清而白色味之甚甘淵然  
丈餘綆不可竭當大暑時飲之若餌白雪咀輕冰凜如  
也當嚴冬時若遇愛日得陽春溫如也其或雨作雲蒸  
醇醇而渾蓋山澤通氣應於名源矣又引嘉賓以建溪  
日注卧龍雲門之茗試之則甘液華滋說人襟靈觀夫  
大易之象初則井道未通泥而不食弗治也終則井道

大成收而勿幕有功也其斯之謂乎又曰井德之地蓋  
言所守不遷矣井以辨義蓋言所施不私矣聖人畫井  
之象以明君子之道焉予愛其清白而有德義為官師  
之規因署其堂曰清白堂又構亭于其側曰清白亭庶  
幾居斯堂登斯亭而無忝其名哉寶元二年月日記

岳陽樓記

慶歷四年春滕子京謫守巴陵郡越明年政通人和百  
廢具興乃重脩岳陽樓增其舊制刻唐賢今人詩賦於



其上屬余作文以記之余觀夫巴陵勝狀在洞庭一湖  
銜遠山吞長江浩浩湯湯橫無際涯朝暉夕陰氣象萬  
千此則岳陽樓之大觀也前人之述備矣然則北通巫  
峽南極瀟湘遷客騷人都會於此覽物之情得無異乎  
若夫霪雨霏霏連月不開陰風怒號濁浪排空日星隱  
耀山嶽潛形商旅不行檣傾楫摧薄暮冥冥虎嘯猿啼  
登斯樓也則有去國懷鄉憂讒畏譏滿目蕭然感極而  
悲者矣至若春和景明波瀾不驚上下天光一碧萬頃

沙鷗翔集錦鱗游泳岸芷汀蘭郁郁青青而或長煙一空皓月千里浮光耀金靜影沉璧漁歌互答此樂何極登斯樓也則有心曠神怡寵辱偕忘把酒臨風其喜洋洋者矣嗟夫子嘗求古仁人之心或異二者之為何哉不以物喜不以己悲居廟堂之高則憂其民處江湖之遠則憂其君是進亦憂退亦憂然則何時而樂耶其必曰先天下之憂而憂後天下之樂而樂乎噫微斯人吾誰與歸時六年九月十五日

邠州建學記

國家之患莫大於乏人人曷嘗而乏哉天地靈粹賦于萬物非昔醇而今漓吾觀物有秀於類者曾不減於古豈人之秀而賢者獨下於古歟誠教有所未格器有所未就而然耶庠序可不興乎庠序者俊乂所由出焉三王有天下各數百年並用此道以長養人材材不乏而天下治天下治而王室安斯明著之效矣慶歷甲申歲予參貳國政親奉聖謀詔天下建郡縣之學俾歲貢羣

士一由此出明年春予得請為幽城守署事之三日謁  
夫子廟通守太常王博士稷告予曰奉詔建學其材出  
於諸生備矣今夫子廟隘甚羣士無所安因議改卜于  
府之東南隅地為高明遂以建學并其廟遷焉以兵馬  
監押劉保節度推官楊承用共掌役事博士朝夕視之  
明年夏厥功告畢增其廟度重師禮也廣其學宮優生  
員也談經於堂藏書於庫長廊四迴室從而周總一百  
四十楹廣廈高軒處之顯明士人洋洋其來如歸且曰

吾黨居后稷公劉之區被二帝三王之風其吾君之大  
賜吾道之盛節歟敢不拳拳服膺以樹其德業哉予既  
改南陽郡博士移書請為之記予嘗觀易之大象在小  
畜曰君子以懿文德謂其道未通則畜乎文德俟時而  
行也在兌曰君子以朋友講習謂相說之道必利乎正  
莫大於講習也諸生其能知吾君建學聖人大易之旨  
則庶幾乎故書之

天竺山日觀大師塔記

師錢塘人也姓仲氏名善昇十歲出家十五通誦法華經十七落髮受具戒客京師三十年與儒者遊好為唐律詩且有佛學天禧中詔下僧錄簡長等注釋御製法音集師預選中書畢詔賜師名遂還故里公卿有詩送行師深於琴余嘗聽之愛其神端氣平安坐如石指不纖失微不少差遲速重輕一一而當故其音清而弗哀和而弗淫自不知其所以然精之至也予嘗聞故諭德崔公之琴雅遠清靜當代無比如師則近之矣康定中

入天竺山居日觀庵曰吾其止乎不下山者十餘年誦  
蓮經一萬過皇祐元年余至錢塘就山中見之康彊精  
明話言如舊一日遣侍者持書謝余曰吾願足矣將去  
人世必藏於浮圖之下願公記焉又一日侍者來告曰  
師化矣其門人中靄等葬師於塔復以師之言求為之  
銘銘曰

山月亭亭兮師之心山泉泠泠兮師之琴真性存兮孰  
為古今聊志之兮天竺之岑

書

奏上時務書

天聖三年四月二十日文林郎守大理寺丞臣范仲淹  
謹詣閤門再拜死罪上書皇太后陛下皇帝陛下臣聞  
巧言者無犯而易進直言者有犯而難立然則直言之  
士千古謂之忠巧言之人千古謂之佞今臣勉思藥石  
切犯雷霆不遵易進之塗而居難立之地者欲傾臣節  
以報國恩恥佞人之名慕忠臣之節感激而發萬死無



恨況臣之所言皆聖朝當行之事而未之行者諒有以也聖人之心豈不至此蓋當乎一日萬機未暇餘論大臣之心豈不至此蓋懼乎上疑下謗未克果行臣請言之以發聖慮臣聞國之文章應於風化風化厚薄見乎文章是故觀虞夏之書足以明帝王之道覽南朝之文足以知衰靡之化故聖人之理天下也文弊則救之以質質弊則救之以文質弊而不救則晦而不彰文弊而不救則華而將落前代之季不能自救以至於大亂乃

有來者起而救之故文章之薄則為君子之憂風化其  
壞則為來者之資惟聖帝明王文質相救在乎已不在  
乎人易曰窮則變變則通通則久亦此之謂也伏望聖  
慈與大臣議文章之道師虞夏之風況我聖朝千載而  
會惜乎不追三代之高而尚六朝之細然文章之列何  
代無人蓋時之所尚何能獨變大君有命孰不風從可  
敦諭詞臣興復古道更延博雅之士布於臺閣以救斯  
文之薄而厚其風化也天下幸甚臣又聞聖人之有天

下也文經之武緯之此二道者天下之大柄也昔諸侯  
暴武之時孔子曰俎豆之事則嘗聞之此聖人救之以  
文也及夾谷之會孔子則曰有文事者必有武備請設  
左右司馬此聖人濟之以武也文武之道相濟而行不  
可斯須而去焉唐明皇之時太平日久人不知戰國不  
慮危大寇犯關勢如瓦解此失武之備也經曰禍兮福  
所倚福兮禍所伏又曰防之於未萌治之於未亂聖人  
當福而知禍在治而防亂故善安身者在康寧之時不

謂終無疾病於是有節宣方藥之備焉善安國者當太  
平之時不謂終無危亂於是有教化經畧之備焉我國  
家文經武緯天下大定自真宗皇帝之初猶有舊將舊  
兵多經戰敵四夷之患足以禦防今天下休兵餘二十  
載昔之戰者今已老矣今之少者不知戰爭之事人不  
知戰國不慮危豈聖人之意哉而況守在四夷不可不  
慮古來和好鮮克始終唐陸贄議云犬羊同類狐鼠為  
心貪而多防狡而無恥威之不悟撫之不懷雖或時有

盛衰大抵常為邊患屬方靖中夏未遑外虞因其乞盟  
遂許結好加恩降禮有欲無違而乃邀求浸多翻覆不  
定託因細事嘖有煩言猜矯多端其斯可驗此唐人之  
至論也今自京至邊並無關嶮其或恩信不守釁端忽  
作戎馬一縱信宿千里若邊少名將則懼而不守或守  
而不戰或戰而無功再扣澶淵豈必尋好未知果有幾  
將可代長城伏望聖慈鑒明皇之前轍察陸贄之謹議  
與大臣論武於朝以保天下先命大臣密舉忠義有謀

之人授以方畧委之邊任次命武臣密舉壯勇出羣之士試以武事遷其等差壯士蒙知必懷報効列於邊塞足備非常其或自謂無虞不欲生事輕長世之策苟一時之安邊患忽來人情大駭自古兵不得帥魚肉無殊乃於倉卒戰鬥之間拔卒為將豺狼競進真偽交馳此五代之前鑒也至於塵埃之間豈無壯士宜復唐之武舉則英雄之輩願在彀中此聖人居安慮危之備備而無用國家之福也惟聖意詳之臣又聞先王建宮共理

天下必以賢俊授任不以爵祿為恩故百僚師師各揚其職上不輕授下無冒進此設官之大端也我國家累聖求理而致太平大約紀綱法象唐室以臣觀之宜法唐興之時不宜法唐衰之後唐興之時特開館殿以待賢俊得學士十八人聲滿天下此文皇養將相之材以論道經邦而成大化也暨至中興往往得人唐衰之後此選不盛我朝崇尚館殿目為清華輔相之材多由此選三館清密古謂登瀛近歲選出內庭逼居坊陌非唐

所謂集仙之館也又其間校讎之職或不由科第以恩而除限以歲年漸至清顯輕十八學士之選恐非文皇養將相之材之意也伏望聖慈與大臣議其可否重為制度以法唐興之時而延廊廟之器此國家之大美也惟聖意詳之又諫官御史耳目之司不諱之朝宜有賞勸自陛下臨政以來未聞旌一諫員賞一御史若言而無補是選之不精言而有補豈賞之不行徒使犯顏者危緘口者安以進藥石為虛言以陳絲髮為供職三載



之後進退雷同臣恐天下竊議朝廷言路未廣忠臣未  
勸將令諫官御史之徒尸素於朝非國家之福也惟聖  
意詳之臣又聞先王義重君臣賞延於世大勲之後立  
賢為嗣餘子則以才自調不使混淆而後大防一隳顏  
波千載凡居近位歲進子孫簪紱盈門冠蓋塞路賢與  
不肖例升京朝謂之賞延無乃太甚此必前代君危臣  
僭之際務相姑息因為典故以至於斯又百司之人本  
避鄉役不踰數歲例與出官莫非貪忍之徒絕異孝廉

之舉使親民政其弊如何開此二途歲取百數無所不  
有實累王風恐非任官惟賢之體也人避衆怨不敢上  
言遂令仕路紛紜祿位填委文武官吏待闕踰年貪者  
益礪其爪牙廉者悉困於寒餓徒於禮闈之內增其艱  
難壯士惜年數歲一舉乃相奔競至有訟爭而况修辭  
者不求大才明經者不問大旨師道既廢文風益澆詔  
令雖繁何以戒勸士無廉讓職此之由其源未澄欲波  
之清臣未之信也儻國家不思改作因循其弊官亂於

上風壞於下恐非國家之福也儻為長久之策則願與  
大臣特新其議澄清此源不以謗議為嫌當以治亂為  
意此國家之福也惟聖意詳之臣聞以德服人天下欣  
戴以力服人天下怨望堯舜以德則人愛君如父母秦  
以力則人視君如仇讎是故御天下者德可憑而力不  
可恃也伏惟皇太后陛下皇帝陛下日崇聖德以永服  
天下之心若夫敦好生之志推不忍之心薄於刑典厚  
於惻隱在物祝網於民泣辜常戒百官勿為苛酷示天

下之慈也唯聖人能之恥珠王之玩罷組繡之貢焚晉武之雉裘出文皇之宮人少度僧尼不興土木示天下之儉也唯聖人能之雞鳴而起孜孜聽政每有餘暇則召大臣講議文武訪問艱難此皇王之勤也唯聖人勉之貴賤親疎賞罰惟一有功者雖憎必賞有罪者雖愛必罰捨一心之私從萬人之望示天下之公也唯聖人行之自古帝王與佞臣治天下天下必亂與忠臣治天下天下必安然則忠臣骨鯁而易疎佞臣柔順而易親

柔順似忠多為美言骨鯁似彊多所直諫美言者得進  
則佞人滿朝直諫者見疎則忠臣避世二者進退何以  
辨之但日聞美言則知佞人未去此國家之可憂也日  
聞直諫則知忠臣左右此國家之可喜也伏惟聖明不  
可不察自古王者外防夷狄內防姦邪夷狄侵國姦邪  
敗德國侵則害加黎庶德敗則禍起蕭牆乃知姦邪之  
凶甚於夷狄之患伏惟聖明常好正直以杜姦邪此致  
理之本也臣又聞聖人宅九重之深鎮萬國之望以靜

制動以重為威如天之高如地之深使人不得容易而  
議也昨親鑾駕順動稍頻恐非深居九重靜鎮萬國之  
意況進奏院報於天下天下聞之恐損威重先朝以御  
宇日深功成天下巡幸之費尚或諫止今繼明之始聖  
政方新宜加憂勤深防逸豫則人心大悅天道降康不  
比先帝功成之年未可輕為巡幸伏惟聖慈再三詳覽  
每有順動必循典禮以服天下之望臣又聞人主納遠  
大之謀久而成王道納淺末之議久而成亂政方今聖

人在上賢人在側取捨之際豈有未至然而刑法之吏  
言絲髮之重輕錢穀之司舉錙銖之利病則往往謂之  
急務響應而行或有言政教之源流議風俗之厚薄陳  
聖賢之事業論文武之得失則往往謂之迂說廢而不  
行豈朝廷薄遠大之謀好淺末之議哉伏望聖慈納人  
之謀用人之議不以遠大為迂說不以淺末為急務則  
王道大成天下幸甚臣又聞聖人之至明也臨萬幾之  
事而不敢獨斷聖人之至聰也納羣臣之言而不敢偏

聽獨斷則干慮或失偏聽則衆心必離人心離則社稷危而不扶聖慮失則政教差而彌遠故先王務公共設百官而不敢獨斷者懼一慮之失也開言路采羣議而不敢偏聽者懼衆心之離也今聖政方新動思公共委任兩地出入萬幾萬幾之繁能無得失乃許羣臣上言以補其闕使上無蒙蔽下無壅塞有以見聖人之不獨斷也天下幸甚然而臣下上言密陳得失未可盡以為實亦當深究其宜或務窺人短長或欲希旨上下動搖



賞罰之柄離隔君臣之情似是而非言偽而辨雖聖鑒之下能無惑焉偶動宸衷無益王道似此密奏之類更望聖慈深加詳覽與大臣議論可否然後施行儻密奏之言便以為實內降處分一面施行則讒譖之人緣隙而進以訐為直以詐為忠使內外相疑政教不一非致理之本也古人有言曰為君難為臣不易者其在此乎伏惟聖明不可不察又自古親近小臣率多纖佞恃國恩寵為人階緣公議未行私請先至如此則人皆由徑

政有多門伏望聖慈深為防慮以存至公之道也臣曲陋之人本無精識覽前王之得失究聖朝之取捨因敢罄而陳之伏望聖慈詳擇一二干犯天威臣無任戰汗激切屏營之至臣某昧死謹言

范文正集卷七